

ELYO LUNYUNGU LWAKO

LUYO VUBA MILYANGO

YA BASINKONDONYINA

 Ndili, mbuli lyoonse, oora na obile kumuka. I mweembeli wakaimikila, wakati, "Lino, Ndi yanda kuzibya kuli ndinywe nyonse basikwaazwa Ba. Branham." Ee, Ndi jisi zintu zinji zya kucita boobo Ndi—Ndi muka buyo mu ziindi zinji. Pele ciindi eci Nse kakonzya kucincina. Kakali kaambo ka bube bwaciindi eco caka cicita ciindi eci. Inga nda cibikka mu bube bwaciindi a kuta subulwa. Kacita kucilanganya, Mukwesu Rose, aniini buyo. Wabuka kabotu, Mucizi Rose. Elyo kondwa kuba a cifumo cino okuno, Mukwesu Rose a Mucizi Rose, a Mukwesu Sharrit, a bakwesu banji, nywebo nobantu babotu okuya.

² Nda mvwa kuti, muntuumwi ula ndaambila, "Cindi yakwa mu Phoenix, bantubonse bakkala buyo mu bulo," kucinca kuli boobo, nywebo mulizi. Bumwi bwa mazuba aya Ndiyo jana cakulya cabuyo. Ba ndaambila kuti inga waba aa cakulya cabuyo buzuba abuzuba zuba tali bali. Ndiyo cilangilila sunu, ku babamba kuvola kuli ceeco.

³ Nda kali kukanana busiku bwainda, okuya ku mbungano imwi. Nse yeeyi ncobeni zina lya ncico. Elyo aboobo twa kajisi ciindi cibotuloko, masiku ainda, ku kuswaangana. Elyo okuya kuli ba Mukwesu Outlaw, a kutala ku Tempe, elyo tu jisi buyo ciindi cibotu mu luswaanano olu. Elyo Ndi langila kuyo swaana boonse aba bakwesu bakutausi ku muswaangano mupati, aboobo tu yooba a ciindi caku baanga nkwiimaima koonse, Mukwesu Rose, a kwaambaula kuli umwi aumwi. Elyo nce ncico Nce kabolela, nkuba a luswaanano. Elyo twa kajisi...kulanga aa makanze esu akujana masena manji loko. Pele Nda kayeeya kuti eci cakali ciindi cibotu maningi, nkaambo Nde elede ku—ku swaana bamwi bandeene, kusika kubabona a kwiinda.

⁴ Ziindizimwi mu kukambauka, mukutausi onse tamwigwi kabotu, nzila yomwe na imbi. Ziindi zinji, bantu bala bweza cintucimwi eco neo wamba a musyobo buyo wa...Ci bala aniimi kuli mbabo, kutegwa ba caambe munzila eyo. Elyo umwi utobelwa cijata, cila yaama aniini ambi. Cintu citaanzi mulizi, cili kulaale kuzwa mu bweende bululeme.

⁵ Aboobo—aboobo swebo, ziindi zinji, mu kukambauka, Ndi baanga ndazilobolola aa tubungwe a tubunga a zintu.

Ciindicimwi, bantu balaamba mpawo, "Mukwesu Branham ulwana kabunga." Eco cili lubide. Nse lwani kabunga. Pele nziindi zinji loko cakuti bantu ba yaamina buyo a kabunga ako, nywebo mwabona, a kubikka bulangizi bwabo aali eco mibusena bwa aali Kristo.

⁶ Ba yanda kubona kuvula kwa mamembala ngo bakonzya kusika ku kabunga ako. Lino, eco cili kabetu loko. Ndi—Ndi... Eco cili kabetu. Ndi yeeya kuti tubunga toonse tweede kuba a mamembala oonse inga twa jana. Eco cili kabetu loko. Pele cindi waboola kusandulwa a kubika kunji ali ceeco kwiinda mbo cita aa kwaambilisyia kwa Muuya Uusalala, mbuli Mukwesu Rose mbwakali kwaamba awa kaindi kainda, a zintu, mpawo ula jana—ula citya bantu kuyeyea, "Tu zulilwa kuli *eyi*, alimwi tu zulilwa kuli *eyo*." Nekubaboo, toonse tu zulilwa kuli Leza. Mwabona?

⁷ Lino, ikuti na Nda kabona muntu kaya buselemuka mulonga mu bwaato... Elyo Ndi ponena ku mulonga mu Indiana, Mulonga Ohio, nkabela Ndili nkoonya kwiinda kuli namutima. Mbusena bubyabi maningi, walo namutitima, nkaabo uyo kupwayaaula mpoonya awo eno. Ikuti na wasola kwiinnka kuli namutitima oyo, kwiina bwaataao bukonzya kuuinda, nkaambo uli, kutandila tukokola tuli foote na fifite kutozya ansi eni, elyo mpawo kuvundauka kupati ku tako, oko kuuma eeni a mwaala, ku tuyala mupati okuya. Alimwi Ndi yeeyela i—i—i mayuwe atala atuma, alapoomoka kensi lya namutitima kulampa kwa tukokola tuli foote, mwabona, awo mpo cuuma kuyaansi, kuuluka mujulu alubo. Elyo mpawo kuunka buyo nkoonya kubbotola mbuli boobo, a kuselemukila mu muzundano mupati oyo utandila tukokola tuli makumi ali cisambomwe na makumi ali ciloba kusakana. Alimwi omuya kuli kambizi ka maanzi kazunguluka kuli nguwo munzila *eyi*, akwaaguzya akuyaansi kwinda mu kazila. Kwiina nzila kuli nduwe kusola kupuna, yebo wabona.

⁸ Muntu waka bbila ciindi cimwi caindi kasamide laifi jaketi. Ba kabona buyo cintu cindi na kaloka, mbuli *boobo*. [Mukwesu Branham wanontola munwe wakwe—Mul.] Noiba mali ayo abuumi, oko kukunka kukali kwa kamufumpila ansi. Alimwi taakwe niba kamujana. Taba zyi eco cakacitika kuli nguwe. Wa kalengelelela aa myaala ma mpela ansi omuya, ndiza maile na obile kuzunguluka, mbuli boobo, nkabela taakwe nzila ya kupona.

⁹ Elyo ikuti na Nda bona muntuumwi kaselemuka mulonga mu kaato kaniini kakaindi, kakkede alya kabala, kuyabuya, alimwi Nda mu kwiilila kuti, "Kozwa mu bwaato obo. Obo bwaato tabu kakonzyi kuzapaula ayo mayuwe makali." Lino, tacili kuti Ndi jisi cimwi kulwana muntu oyo, nekubakuti Nde elede ku mubwekela a kwaambaula canguzu loko kuli nguwe. Ta cili Ndi jisi cintu cili coonse kulwana muntu. Nda

muyanda mwaalumi, pele Ndi lizi uyo candaula. Ako nke kaambo Nce muongolola. Nkaambo tali... Nku kaambo kakuti Nda muyanda, nke—nke kaambo Nce kaongolola. Ikuti na Nse kwe ndaba, inga Nda amba kuti, “Ee, koleka kubotu,” ko zumanana, wabona, ikuti na Nse kamu bikkila maanu.

¹⁰ Pele kaambo Nce wamba zintu ezyo nkaambo Ndili musungu ku Mbungano. Ndili—Ndili musungu ku Mbungano ya Leza. Elyo Nda—Nda bijilwa ku Ci bona buyo kaba a mizeeo ya tubunga. Elyo Ndi lizi bweende obo, eyo nje nzila mbungano yoonse mboya kaunka ku myaala, mboonya mbuli boobo, kuyaandi eni mu bweende bwa kabungan ako.

¹¹ Amuyeyeye buyo zya lubukulusyo mu ciindi ca bana Luther, amulange oko nko lwakainka. Elyo mbo lwasola buyo kuuma ceeco, talu buki alimwi. Bana Lutherani taakwe niba kajokela. Amulange ba Methodisti Wesleyani, taakwe niba kajokela. Amulange ba Piligrimu Holinessi, ba Nazareni, boonse bamwi babo, ba Baptisti, Presbyteria. Bali jisi lubukulusyo, elyo mpawo muntu umwi wabuka a nguzu zya Leza ali nguwe, ula talika kweenda mu Muuya. Mpawo mwaalumi oyo mbwa unkila buyo, mpawo baka kkala mu kabunga kuzwa kuli kaako.

¹² Mbuli Moody wa Bbaibbele Moody, busena bubotu, pele ta cikabi mbuli Moody mbwa kacita. Mwabona? Elyo zintu ezyo Moody nzya kaiminina, alo mamaile ali milioni kuzwa kuli ncico, aboobo nceeco we. Elyo lino koonse mbupampu, oko Moody nkwa kajisi aa Muuya, nywebo mwabona. Elyo aboobo mulamula jana eco, mu zintu ezyo.

¹³ Lino, cindi Ne kasaanguna kutilika, a kuboola okuno ku Phoenix, myaka yakainda, mu mulimo wa Pentekoste, kajisi coolwe ca kutilika kabunga lwangu. I bakwesu ba Lat-Rain baka boola kuli ndime, bakati, “Eci ncecico. Atu talike. Baa, tu yooba—yolemekwa maningi kwiinda boonse bamwi babo.”

¹⁴ Nda kati, “Luse! Eco tacili ncico. Eco tacili—eco tacili cintu, bakwesu. Uli—uli mamaile ali milioni kuzwa mu—kuzwa mu mugwagwa. Leza taka cileleke.” Amubale makani ako aakale. Amubale Bbaibbele. Takukabi kabunga kambi kayo kazwa kuli nkako, ako kakazwa kuli aka. Mbo mbubo. Eci ciyo bunganya a kunjila mu... Cili mu ciimo ca Laodikeya lino. Pele Njo kwaambila, mukwesu, takucikwe limbi tubunga tulelekewe aa Leza, ku buka. Takukabi cintu ca ceeci. Tuli ku Kuboola kwa Mwami. Mwabona? Elyo Leza uyo gusya basyaalizi kuzwa mu kabunga aka kapati ka bupaizi, eco cicitika lino, kuli Nabwiinga, pele takukabi cintu ciyo bunganya, kumuuya, limbi. Mwabona? Ca mana.

¹⁵ Cindi Nda bona bakwesu bangu, bakwesu bayandisi, kaba yaamina nzila eyo, mpawo Nda cileta buyo mukati a koonse Nkwe jisi. Elyo ziindi zimwi bakwesu baamba, “Ee, Mukwesu Branham ula tulwana. Tuli...” Eco cili lubide. Ma! Eco—eco

nce cintu cipati loko kuzwa ku mizeeo yangu, nkuba kulwana muntu uli oonse. Nda—Nda mu iminina. Ndili munyoko, mwabona, a kusoleka nkwekonzya. Elyo nke kaambo Nce taka sangana kabunga kamwi kali koonse, kutegwa Ndi konzye kwiima mu mwaakwe a kwaamba, “Mukwesu, utaciti. Eyo taili nzila.”

¹⁶ Ba lati, “Tu zulilwa ku Assembilisi.” Eco ncibotuloko. I Assemblies of God cali cilongezyo cikali kuli ndime. “Tu li Foosikkweya.” Ee, amulange obo cilongezyo mbo bakabede kuli ndime. “Tuli Zina lya Jesu.” Amulange obo cilongezyo mbo bakabede kuli ndime. “Nde *ndiswe*, i *bamwi*.” Kufumbwa, nzilongezyo zyoonse. Balo—balo mbantu ba Leza. Mwabona? Elyo bantu ba Leza bali muli koonse kwa ncico.

¹⁷ Elyo cindi twa talika kulibunga tobeni, kwaamba, “Tuli buyo kabotu aniini kwiinda Mbungano ya Leza,” nywebo mwabona, na, “Tuli babotu aniini kwiinda Foosikkweya na Zina lya Jesu,” na cintucimwi mbuli ceeco. Cindi twa buyo... Inga twa impana aniini mu mizeeo. Toonse twa kaunka kuyolya cisusulo sunu, toonse inga twa bweza pai zyandeene, pele tulya paai mbubonya buyo, nywebo mwabona. Oyo ngo muzeezo. Aboobo muzeezo wa ncico, ngwa cuti, ikuti—ikuti na twa konzya buyo kubona luswaanano lwesu. Aboobo muta inki kuyaama ku kabunga. Kuyaama ku Kalivari. Wa kaba fwide ku zintu ezi zimbi. Mwabona? Elyo Nda syoma...

¹⁸ Anda ambe ceeci kuciindi noili mu mizeeo yangu. Nda syoma cuti kabunga kakalizya cibeela cibotu. Nkambo, kuli ziindi zinji, bakwesu, mbuli bubi mbo tu bijilwa ku ciyeeya, kwakali zintu zisyango akati kesu, a zintu mbuli ezyo, zyakali okuno zyaandeene. Elyo bantu bayo bweza buyo abo buzumini bumbi aku sabalanganya bantu kuli konse. Elyo nkamu ya bakwesu kuba antoomwe eyo...eyo Nje...Eco nce Ndi pandulula ciyabuya mbuli mbo bakacita mu mazuba mataanzi a misyobo yoonse ya zintu. Elyo—elyo tuli cijisi coonse sunu, mwabona, ci ceenda buyo. Elyo bantu abo bakonzya kulileta antoomwe...

¹⁹ I cifwanikiso cini ca Pentekoste, ku muzeezo wangu, cindi caboola ku kabunga, ni i—i mbungano, Mukwesu Petrus, mbungano ya Filalfia mu Sweden. Lino, ta babikkili maanu ku musyobo wa njiisyo njo mujisi, kufumbwa cuti ngwa Malembe. Ikuti na uyanda kucibona mu nzila *eyi*, nzila *eyo*, na kufumbwa cintu, kufumbwa cuti kojisi luswaanano a kupona buumi busalala ncobeni. Mpaawo we. Eco ncibotu. Elyo ikuti na uyanda kwaamba cuti Jesu ulaboola aa mbizi iituba, elyo umwi umbi wakati Ula boola aatala lya kkumbi lituba, amu Mu lange mu nzila eyo. Ko zumanana buyo, kufumbwa cuti kopona buumi busalala bubotu a kuba a luswaanano. Eyo nje nzila. Nce ncico.

²⁰ Kuti, ee, lino, ako nkekaambo komwe, beenzuma, kuti Ndili antoomwe a nkamu ya Bantu Basimilimo. Nkaambo, Ndi lizi kuli zintu zinji omuya zyeedele kululamikwa. Pele nku i—nku bubotu nko tu jisi. Inzya. Mbo mbubo. Inzya. Kuli zintu zinji ezyo Nze elede kwaamba. Elyo—elyo nywebo, bakwesu awa bayo mwaambila, Nse kavunga fwaindi imwi a mbabo. Ndili waano mbuli mulanda wa Leza, ku kwaamba Bwini. Elyo Nde elede ku cipeda bwiinguzi. Mbo mbubo. Mukwesu Rose wakati, “Ako nkekaambo nco tu kuyanda.” Ee, eco—eco, ee, ta tukonzyi . . . Swebo, tweedele kukkala a Ijwi eli. Mwabona?

²¹ Ciindi buyo cimwi cainda, Ndi yeeya kuti, wakali muli . . . Nda kali ku masi aambi, na okuya mu kasuwa mwaka wainda, elyo bakali jisi muswaangano, elyo bamwi bakwesu bakali ku kankaiziza mu muswaangano oyu mupati oko nkoba kajisi basimakwebo, koonse ku cisi. Elyo bakali kwaambaula makani, “Nda kajisi busena buniini kunselelo ku kkona. Mulimo wangutii wakali mubotu. Elyo Nda kajisi ciindi ciyoosya. Elyo cintu citaanzi nywebo mulizi, Nda—Nda kaboola kutambula Kristo, alimwi—alimwi, oh, Ndi jisi zintuzyonse lino.” Lino, eco ncibotu. Tula lumba eco. Eco ncibotu, pele kuzwidilila ta caambi lyoonse Kristo. Kuti, mwabona, alimwi tweedele kulangilila ceeco. Lino, eco ncibotu. Mwabona? Ndi . . . Taakwe kulwana ceeco.

²² Pele Ndi baanga nditobela bakwesu masiku ayo. Twa kaselemukila ku motelo oko i—i nkamu yesu nko twakali kukkala, a Mukwesu Shakarian a toonse swebo. Elyo Nda kati, “Ee,” Nda kati, “bakwesu, Ndiyo mwaambila.” Nda kati, “Ndi—Ndi yeeya kuti bakwesu ni nkamu mbotu kwiinda ya baalumi Mbe kasola kuswaana, mu buumi bwangu. Pele,” Nda kati, “i cintu ca ncico ngu,” Nda kati . . .

²³ Nse zulilwi ku kabunga kali koonse, pele Ndi zulilwa ku luswaanano olo a ceeco. Nda bweza kkaadi lya luswaanano a mbabo, kkaadi lilikke Nde bweza, nkaambo liiminina tubunga toonse, nywebo mwabona. Elyo nce ncico Nce yanda. Nce ncico Nce kakatilila.

²⁴ “Pele,” Nda kati, “i cintu eco candika, kuti nywebo bakwesu kumbele lya baalumi abo kunselelo kuya, zyalo nziindi zili cuulu kuzwidilila loko kwinda mbo mubede, alimwi mpaw kusola kubaambila kuti Kristo nkuzwidilila. Muta soli ku basambala ceeco.” Mwabona?

²⁵ Muta soli kweezyanisa a inyika. Lekela inyika uboole mu masena esu. Uta unki mu nyika yabo. Mwabona? Mwabona? Uyo leya kuya ku busena bwabo, toka balami a mbabo. Kwalo, Makanimabotu tabalami; ala mweka. Hollywood ilabalama. I Makanimabotu alamweka. Kuli lwandaano lunji akati ka kumweka a kubalama.

²⁶ Elyo aboobo, lino, elyo Nda kati, “I bakwesu bataanzi bana Pentekoste baka jisi cintucimwi, bakasola ku cigwisya, a

kusanina bacete, a zimwi zimbi mbuli eco, a kuzwa katakwe cintu, mwabona, ku kambauka Makani mabotu, ku kubeleka antoomwe.” Nda kati, “Lino tu soleka kuli kankaizya ali kunji nko tu jisi.” Nda kati, “Ino ndwandaano!”

²⁷ Elyo mukwesu muniini tuyandisi, nikwakainda kaindi kaniini wa kabuka, kati kuli ndime, wa kati, “Mukwesu Branham, obo bwakali bumwi bwa bulubizi bupati maningi obo bantu mbo bakacita lyonse.”

²⁸ Elyo Nda kati, “Lino, langa, mukwesu, Nse kali kusola ku jalilwa bantu kusambala ezyo nzoba jisi. Pele Ndi soleka buyo kubamba kaambo kuli baaba basimakwebo.”

Wa kati, “Obo bwakali bulubizi bupati maningi, bantu.”

²⁹ Nda kati, “Ba kacita eco ku Muuya Uusalala. I Muuya Uusalala waka baambilila kucita eco.” I Muuya Uusalala waamba kufumbwa muntu kucita cintu cili coonse, ula cita eco Nca kwaambilila kucita.

³⁰ Elyo wa kati, “Ee, bwakali bulubizi bubyaabi loko mbungano mboya kasola kucita.”

³¹ Nda kati, “Nkaambonzi, mukwesu?” Elyo mpoonya awo kumbele lyu muntu oyo ngo Nda kali kwaambaula awe.

³² Wa kati, “Nkaambo, mbwa kanjilila buyo anii mu mbungano okuya, kwakali lwandaano akati ka ba Griki a i—a ba Hebrayo, abamwi bambi,” kati, “abo bantu tiiba kajisi busena bwa kuunka. Tiiba kajisi akwalo muunzi waku jokela.”

Nda kati, “Mbubonya buyo luyando lwa Leza.”

Wa kati, “Mbobuti olo mbo lunga lwaba luyando lwa Leza?”

³³ Nda kati, “Ba kaunka koonse, kaba mwaisya Makanimabotu, nkaambo teeba kajisi busena bwa kuunka.”

³⁴ I Muuya Uusalala tau bambi bulubizi buli boonse. Tau ciciti buyo. Kwa mana. Elyo mbuli Mbwe kali kukanana busiku bwainda, mweelede buyo kubweza Leza, a kubweza Ijwi Lyakwe, a kujatilila ncobeni kuli ndilyo. Takukwe makani oko Nko ukusololela, kozumanana buyo ku Li tobela. Ko cibamba mbuli boobo.

³⁵ Pele Ndili i—i sikugwasya ncobeni luswaanano lwa Bantu Basimilimo. Elyo muswaangano onse wabaiminizi oyo Ngwe tambilidwe, Nda unka a kukanana lyoonse, kwaamba zintuzyonse Nze konzya. Kutali buyo kupanga cintucimwi ca kwaamba kuti, eco inga cakonda muntuumwi, *Niini-a-niini*. Pele ciindi coonse Nda inka ku muswaangano wangu, Ndi sola kubala a kukomba a kufwambaana, a kwaamba, “Mwami Jesu, ino—ino inga Nda amba kuti inga cagwasya bantu abo.”

³⁶ Bantubonse balizi kuti Nseli mukambausi. Nseli mukanazi. Ndili—Ndili... Kufumbwa muntu ulizi obo. Nseli mukambausi. Mulumbe wangu—wangu upailila balwazi, azimwi zimbi mbuli

zeezyo. Pele, Nseli mukambausi. Kufumbwa muntu inga waziba ceeco, kondi swiilila nkekambauka. Pele eco Nce wamba, Ndi yanda kubikka cibbudu muli ceeco kuyo cita cintucimwi.

³⁷ Kutali kwaamba kuti, "Sa tali i—i mukanazi wanguzu? Sena ta belesyi bwaambe bwakwe bwa cisyobo kabotu? Sa tali mubotu mu cikambaukilo?" Nse yandi ceeco. Nse—Nse kakonzya kucicita. Leza taka ndiita kuli ceeco.

³⁸ Pele Ndi sola kujana cintucimwi eco ciyo gwasya muntu oyo, alimwi mbungano eyo yaba mbungano mbotu, cigwasya kuba bantu babotu, ku cikombela.

³⁹ Lino, Nda kali kubaanga nkwaambaula mbuli boobu nkaambo Nda kabona bantu basyoonto kaba eibungana mukati, nkabela yakali kuwa. Ako nkekaambo Nda kali kwaamba zintu ezi. Lino, kkota kuzwa.

⁴⁰ Elyo lino Ndi yanda kulumba mukwesu. Nda kamuziba Mukwesu Fuller kwa ciindi cilamfu, lyoonse kamuyanda, kunsi lya moyo wangu. Elyo tu jisi zintu zinji zikozyenye, Mukwesu Fuller. Elyo aboobo twa... Nda kabona Mukwesu Fuller lino kwa myaka minji, alimwi Nda kamuziba kuba muntu wini ncobeni wa Leza, nkabela Nda muyanda. Elyo Ndili waano cifumo cino ku luswaanano. Kuusa loko kuti Nda impya busiku bwakwe kuti cindi nica kazibisigwa mu busena okuno, pele cakali cintucimwi Nce takali kukonzya kugwasya. Elyo Ndili kkomene kuba kokuno cifumo cino, kubona mbungano yakwe, mbotu, obo Leza mbwa kaba sumpuka a kubalongezya. Elyo—elyo zintuzyonse ezyo Nzya kamucitila, Nda lumba ncobeni eco. Akube kuti Leza azumanane kumulongezya, a kuleleka cikombelo eci, elyo—elyo i—i nkamu ya basyomesi, bamadaikona, a mamembala oonse aa mbungano. Elyo akube kuti mukomene a kuba acoolwe mu luzyalo lwa Mwami, ngo mupailo wangu mubombe.

⁴¹ Lino, katutana kuboola ku Ijwi, atu boole kuli Mukamwini, lutaanzi. Atu kotamike mitwe yesu kwakaindi buyo kaniini ku mupailo.

⁴² Kuciindi notu bikka cakusinizya lino mu Busyu bwa Leza, a mitwe yesu a myoyo kiikoteme, sa kuli nkumbizyo mu moyo wako, cakuti cintucimwi nco bulide, eco nco yanda Mwami ku kupa, kuti inga Nda yeeya mu mupailo wangu cifumo cino okuno ku mbungano? Sa inga wa ciziba buyo kwiinda ku kutambika janza lyako? Ko cibamba buyo mu mizeezo yako, obo mbo cibede. I Mwami kopa umwi aumwi wanu nkumbizyo yanu.

⁴³ Taata uusalala a Leza uusalala, Oyo wakalenga zintu zyoonse kwiinda muli Kristo Jesu, ku bulemu Bwakwe, twa boola mu Busyu. Bwako cifumo cino a kupa kulumba ku moyo wesu. Elyo mbuli mbo twa keenda kwiinda mu mvula, nkabela guwo lilaunga, mvula ili mukuwa, twa komba, Taata Wakujulu, kuti Uyo tila atala ali ndiswe mvula yaku Julu, i mvula ya

kumuuya, mvula ncaalizi a mvula ntaanzi, antoomwe, mu myoyo yesu sunu.

⁴⁴ Twa komba, Taata, kuti Uyo longezya mbungano eyi. Tuli lumbide kapati kuli ncico, ku mweembeli wayo, ku mbunga yayo, ku i...busena oko bantu nkoba konzya kuswaanana aciuli atala lya mitwe yabo a zyuuno zibotu zyakulikwaya ku kkalilamo.

⁴⁵ Tula jokela mu mizeezo yesu ku makani aakale aa Mbungano eyi ntaanzi, eyi Mbungano, ya Katolika, ntaanzi ya buapostolo, a kubona obo mbo bakakkala mu nkwaya zya mabwe na kufumbwa cintu neco bakali kukonzya, kumvwa Ijwi lya Leza, elyo mpawo kufugama aa cibuye, nkabela cilatontola a mwaala a tombe, elyo awo kujatilila maanza abo kutozya ku Julu a kubotelwa Busyu bwa Muuya Uusalala. Kubapa kukanza kuli boobo mu buumi bwabo kusikila bayo enda mu bulyango bwa balavu, kutasola akwalo kuputa, pele kumwetamweta ku busyu bwabo, kulanga ku Julu, mukuziba, mu maminiti masyoonto, inga baba mu Busyu Bwakwe Oyo ngo bakali kuyanda.

⁴⁶ Oh, lusyomo lwa matata esu, lucipona, mu ntolongo ya museenengo, mabangabanga a cceba. Bukulusya muli ndiswe, O Mwami, lusyomo luli booboo. Kotupa cilongezyo cipati ca buapostolo ica Muuya Uusalala.

⁴⁷ Umwi aumwi sunu oyo wajisi maanza abo mujulu, Uli zyi eco ncoba bulide, Mwami. Yebo ulizi cali kunze lya janza eelyo, kaambo a bukanze mu moyo oyo. Yebo olkke uukonzya kupa kubula koonse, Mwami. Alimwi Nda bakaombela, mukuta ziba kubula kwabo, pele kupa mupailo wangu mbuli cikumbizyo kuli mbabo. Mbuli mulanda Wako, Nda komba cakusinizya kuli umwi aumwi, kuti, kufumbwa cintu ncoba lomba, akube kuti batambule. Ba longezye, Taata.

⁴⁸ Elyo lino mbuli mbo tubala aa Ijwi Lyako, a kuyiisya kkilasi eyi ya kwiiya Munsono, mbuli mbo kwakabede, cifumo cino, Nda komba kuti Uyo gwisy Majwi aya a kupa kutasyoma koonse kuzwa kuli ngawo, Mwami; kuti, kufumbwa nguzu zya Saatani inga zyasola kuba mbaakani, eco inga ca Li lesya kukomena. Akube kuti ciinke mu moyo aumwi, alimwi alya likabe masamu amicelo ya bululami, Mwami. Lusyomo, kuleta eco Neco kasala Ijwi Lyako kucita, kwaamba, "Ta cika bweedi cabuyo kuli Ndime, pele Ciyo zwidilizya eco Nec caka kanzilwa."

⁴⁹ Lino, Mwami, salazya mulanda Wako. Ijwi Lyako lyaka salazigwa kale. Elyo, antoomwe, akube kuti tu konzye kusanizya butanga obo Muuya Uusalala mbo wa tupa i-i bubanzi. Twa lomba mu Zina lya Jesu. Ameni.

⁵⁰ Lino, kuli ndinywe nomuyanda kubala ziindizimwi, antoomwe a i-i Mulumbe, Inga nda... Nda mubuzya, ikuti na

inga mwa jula mu Bbuku. Elyo Ndi jisi Mulumbe buyo muniini wa cikolo ca Munsono, mbuli, ku bantu cifumo cino.

⁵¹ Sa mulakonzya kundimvwa kabotu, koonse kuzunguluka, koonse ku busena? Nda keenzya eyi maikkrofooni. Nda aanga jwi buyo liniini. Mebo, calino Ne kasika ansi awa, Nda kabweza kapila. I dyabulosi wakasola ku bubotu bwakwe kundi tantamuna kuzwa awa. Ta ndizi. Ndi syoma kuti Leza uyo tila cintucimwi ncobeni cipati aa muswaangano oyu mupati ciindi eci, nkaambo Saatani wakacita zintuzyonse nzya kakonzya kundi tantamuna kuli ncico.

⁵² Pele lino tuyu bala kuzwa ku Matalikilo, cipati 22. Elyo nyewebo nomuyo jula mu Bbaibbele lyanu, atu bale cibeela ca Ndilyo, antoomwe. Matalikilo 22, atu talikile aa kampango ka 9.

Elyo ba kaboola ku busena obo Leza mbwa kamwaambila; elyo Abrahamu wakayaka cipaililo okuya, akuyala nkuni mu ncililano, a kwaanga Izaka mwana wakwe, a kumulazika aa cipaililo ca nkuni.

Elyo Abrahamu waka tandabika janza lyakwe, a kubweza ntibba kuti ajaye mwana wakwe.

Elyo angelo wa MWAMI waka mwiita kuzwa ku julu, a kwaamba, Abrahamu, Abrahamu: elyo wa kati, Mpaaawa Mpendi.

Elyo wa kati, Uta bikki janza lyako aa musankwa, akwalo utaciti cintu cimwi kuli nguwe: nkambo lino Ndi lizi kuti ulamu lemeka Leza, mukubona kuti tokasya mwana wako, mwana wako alikke kuzwa kuli ndime.

Elyo Abrahamu wakatambya meso akwe, a kulanga, a kubona kusule lyakwe mugutu wambelele waka patide mu i ziteo ku meja akwe, kwinda ku meja ayo, na ku meja akwe, mubwini: elyo Abrahamu wakainka a kubweza mugutu wambelele, a kumutuula aa . . . atala ku cipaizyo ca kutenta mucibaka ca mwana wakwe.

Elyo Abrahamu wakaita zina lya busena kuti Jehova jire: mbuli mbo caambwa ku buzuba obuno, Mu cilundu ca MWAMI ciyo bonwa.

Elyo angelo wa MWAMI wakaita Abrahamu kuzwa ku julu ciindi cabili,

Elyo wakati, Kuli lwangu Nda konkezya, mbwaamba i MWAMI, . . . nkaambo kakuti wa cita cintu eci, alimwi to kasya mwana wako, walo mwana wako alikke:

Kuti mu kuleleka Njo kulongezya, alimwi mu kuwuzizya Njo vuzizya inyungu zyako mbuli nyenyezeezya . . . julu, elyo mbuli miseenga . . . aatala lya nkomwe ya lwizi; elyo lunyungu lwako luyo vuba milyango ya basinkondonyina;

⁵³ Ndi yanda kubweza oyo mwaambo wamamanino awo ku cibalo: *Elyo Lunyungu Lwako Luyo Vuba Milyango Ya Basinkondonyina*. Eco i—i ncisyomezyo cibotu loko.

⁵⁴ Lino, toonse tuli zibilene kabotu a kaano aka, antela ku kabala koonse, ciindi a ciindi, wa Abrahamu, a nzila Leza mbwa kamwiita kuzwa mu cisi cakwe, a nzila mbwa kali muntu buyo uzizilwe, taakwe cintu cisalesale. Pele Leza waka mwiita a kumubamba cisyomezyo.

⁵⁵ Lino, Ndi yanda kuti mubone kuti eci cisyomezyo Leza nca kabamba Abrahamu takali buyo kuli Abrahamu, pele cakali ku lunyungu lwakwe kuzwa nguwe. Lino, bantu banji balati, “Oh, ikuti Ne kali mbuli Abrahamu, ikuti Ne kali awo Leza mpa kaambaula kuli ndime a—a kundipa kaanzambwene mbuli Mbwa kacita Abrahamu, mpawo Ne kali kuyooba. Inga—Inga ndaba a lusyomo ncobeni, Mukwesu Branham, ikuti ni Nda jisi buyo, ikuti na Leza wakali kwaambaula kuli ndime mbuli Mbwa kacita Abrahamu.” Pele uli jisi cisyomezyo nciconya eco Abrahamu nea kajisi, nko kuti, ikuti na uli Lunyungu lwa Abrahamu.

⁵⁶ Mpawo wati, “Pele, Mukwesu Branham, Ndili Munamasi. Nse kakonzya kuba a lunyungu lwa Abrahamu.”

⁵⁷ I Lunyungu lwa Abrahamu tiilwakali lunyungu lwa kunyama. Lwakali Lunyungu lwa kumuuya, lwa kupalulwa kwa ceeco tii cakali cintu. I cisyomezyo, Wa kamupa akwalo kakutanaba kupalulwa. Pele kwa kapegwa kuli nguwe kakutanaba bupalule, alimwi takali kaambo kakuti wa kapalulwa a mu cipangano a Leza munzila eyo. Nkaambo kakuti Abrahamu wakali kusyoma Leza.

⁵⁸ Elyo Lugwalo lwakati, kuti, “Cindi twafwa muli Kristo, tuba Lunyungu lwa Abrahamu.” Paulo ula cikanana, “Elyo oyo mu Juda tali mu Juda waanze, pele mu Juda wamukati.” Nkikaako, ikuti na wazyalwa ku Muuya wa Leza, “muli Lunyungu lwa Abrahamu, alimwi muli baswaana a Abrahamu kweendelana ku cisyomezyo.” Mwabona? Nkikaako zisyomezyo zyoonse ezyo Leza nzya kapa Abrahamu nzi zyako, nkaambo kumuuya muli Lunyungu lwa Abrahamu.

⁵⁹ Elyo uli mu Juda maningi kwiinda mbo yooba ikuti na wakazyalwa mu bulowa bwa Cijuda, elyo mpawo—elyo mpawo kuba mu Juda wa orthodokisi mu mbungano eyo, a kufwaba kupati kwa Muuya Uusalala oyu muyandisi a Mwami Jesu Kristo. Mwabona? Muli ba Juda banji, nkaambo muli ba Juda abo bakazyalwa ku cisyomezyo kuzwa ku Julu, eco Leza nca kapa Abrahamu, alimwi Abrahamu waka cizumina ku lusyomo, alimwi eco nce caka mubamba obo mbwa kabede. Nekubaboobo, mu Juda uli mukupambula buyo, a kuzabuka, mu Hebrayo, a zimwi zimbi mbuli ezyo.

⁶⁰ Lino, pele cindi wali pambula lwako kuzwa ku zintu zya inyika, kazabuka munkali oyo wandaanya, alimwi nkwendendeenda mu nyika nyenzu, nyika mbuli mbo mwa takaliko, ku matalikilo, a bantu abo mbotana swaangana kumatalikilo, mpawo waba mu Juda wakumuuya. Nkaambo, nzila njionya Abrahamu, ku lusyomo, mbwa kasiya cisi cakwe, kasiya bantu bakwe, kainka mu nyika nyenzu a bantu beenzu. Wa kasiya bantu bako, kasiya inyika kusule, kasiya balongwe bako kunze, kazabuka, kwiinda mu Bulowa bwa Jesu Kristo, a basikukkala kkala, kuyandaula Munzi Wa Muyasi a Sikuucita kali Leza, mbuli Abrahamu mbwa kabede. Bamuzwakule, antoomwe a Nguwe, kabakkala mu matente, mambungano, basicisi nyina ba Bwami bwaku Julu, baswaana ba zintu zyoonse kwiinda muli Jesu Kristo. Mwabona? Twa zabuka, kwandaanisigwa.

⁶¹ Lino, Abrahamu, cisymezyo caka pegwa kuli Abrahamu a Lunyungu lwakwe kuzwa nguwe. Lino, Leza wakapa cisymezyo eci kuli Abrahamu, ca Lunyungu lwakwe, naka vuba mulyango wa sinkondo nyina Na kamana kusolekwa kusunka Abrahamu, kasunka Abrahamu. Lino, kumane kusunkwa, mpawo . . .

⁶² Abrahamu waka sandulwa kale, twa kali kwiiita, kuzwa ku buhedeni kunjila Leza. Elyo mpawo Leza waka mupa, mbuli citondezyo ca Muuya Uusalala, kupalulwa. Mpawo, kumane kupalulwa, mpawo kwa kaboola ciindi cakusolekwa.

⁶³ Ii cikozyanyo cibotu-loko awa ca Mbungano, cakuti, ni twa kamana kufutulwa, mpawo tula pa caando ca kupalulwa kwa cisymezyo, eco citali ca nyama, pele ca Muuya. Alimwi Muuya Uusalala mbupalule bwesu. Ncifulo cibosya ca Leza. Lila pambula a kukosola zyaanzyo zya mubili, zya inyika, kuzwa kuli ndiswe. I Ijwi lya Leza, lilabosya kwiinda panga lya mabemba obilo! Aboobo, nywebo mwabona, jokela nkoonya alubo. I Ijwi lya Leza nce cintu eco Muuya Uusalala nco ubelesya; kutali tuyanza twabuzumini, kutali tubungwe. Pele Ijwi ndeli bandaanya kuzwa ku zintu zya inyika. Cila tenda mizeezo yesu a zintu, a kutusalazya cakumaninina kuli Leza.

⁶⁴ Jesu wakati, "Ikuti na mwakkalilila muli Ndime, a Ijwi Lyangu muli ndinywe." Mpaawo we. Mpawo, talili ijwi lyanu. Ndi Ijwi Lyakwe. Mpawo, nywebo mwabona, "Ikuti na mwa kkalilila muli Ndime, a Ijwi Lyangu muli ndinywe, inga mwalomba eco nco muyanda." Uh-huh. Mwabona? Mbo cibede, toli mukwaambaula ijwi lyako lini. Uli mukwaambaula Ijwi Lyakwe.

⁶⁵ Aboobo mpawo Muuya Uusalala ngo Umwi ugwisya Ijwi lya Leza a kutwandaanya kuzwa ku zintu ezi zya nyika, mwabona, kupalulwa, kuzanduka. Mpawo ulainda mu ciindi ca kusolekwa.

⁶⁶ Lino, Abrahamu, nakamana kwiitwa kuzwa, cisi ca bana Chaldea, munzi wa Ur, wa kaba muzwakule, sikweendeenda. Elyo mpawo Leza waka mwiita, nakamana kutondezegwa kuti

uyo zumanana a kubweza Leza ku Ijwi Lyakwe. Mpawo, eco Leza nca kacita kaindi, waka mupa citondezyo, cakuti Wa kamuzumina, elyo Wa kamupalula. Elyo wa kapalula Ishimaeli a beng'anda yakwe boonse.

⁶⁷ Elyo lino nywebo mwabona, cindi—cindi waitwa kuzwa, lutaanzi ula zumanana kwiinda mu kubetekwa, kubona kuti na uyo zumanana ncobeni. Elyo mpawo Leza ula kupa Muuya Uusalala, cili ncizibyo cakuti Wa katambula lusyomo lwako olondoamba kuba muli Nguwe. Amu nditobele lino? Uyo cizumina.

⁶⁸ Lino, Nda kali kwaambaula ku... Ndiza kuli bakwesu bamwi bayandisi bana Baptisti bakkede awa. Elyo bantu boonse balizi kuti Nda kazwa mu mbungano ya Baptisti. Nda kali kwaambaula ku mukwesu wangu muna Baptisti. Elyo wa kati kuli ndime, "Mukwesu Branham?" Wa kali Mwiiyi walwiiyo lwa Buleza, mutu mubotu, Munakristo wini. Wa kati, "Pele, Mukwesu Branham, nkokuli nko jana lubapatizyo olo lwa Muuya Uusalala mukuba cintu ciimpene kwiinda lusyomo muli Kristo Jesu?"

Nda kati, "Cili andeene, mukwesu wangu tuyandisi."

⁶⁹ Wa kati, "Sena to yeeyi kuti cindi watambula Kristo, ula tambula Muuya Uusalala?"

⁷⁰ Nda kati, "Nconzyo. Pele," Nda kati, "yebo wabona, uli mukwaamba biyo kuti wakatambula Kristo, kusikila Wa ciziba."

⁷¹ wa kati, "Mukwesu Branham, Abrahamu wakasyoma Leza, nkabela kwa keelelezegwa kuli nguwe ku bululami."

⁷² Nda kati, "Iiyi. Pele Leza waka mupa citondezyo, cakuti Wa katambula lusyomo lwakwe, cindi Na kamupa caando ca kupalulwa, kuti Wa kaziba lusyomo lwakwe." Ameni.

⁷³ Lino, cindi twa tambula Kristo mbuli Mufutuli wesi, mpawo, ikuti na tuli sinizizye muli ceeço, mpawo Leza ula tupa citondezyo, kuti Wa katambula lusyomo lwesu muli Kristo, kwiinda ku kutupa caando ca kupalulwa, uuli Muuya Uusalala. Eco ncaando ca kupalulwa. "Muta penzyi Muuya Uusalala wa Leza kuli nguwo mwa kaandwa ku Buzuba bwa Lununuko lwanu." Kutali ku muswaangano utobel; pele ku Buzuba bwa Lununuko lwanu. Mbo mbubo, ba Efeso 4:30. Lino, eyo nje nzila mbo tu tambula Muuya Uusalala.

⁷⁴ Lino, ikuti na wati, "Oh, Ndili musyomi," alimwi Leza tana kukupa Muuya Uusalala pe, Tana ciziba. Yebo uli muku lyaambilila buyo kuti yebo ulasyoma. Pele ciindi kuzumbaauzya koonse... Ta ndaambi kuti toli musyomi eno. Mu cibeela cimwi, uli musyomi.

⁷⁵ Pele cindi Leza ajana luzyalo, ula jana luzyalo kuli Nguwe, mubwini, alimwi Ula kuziba kuti uli mwana Wakwe, alimwi Uli zyi moyo wako, alimwi Ula bona kusinizya kwanu, Uli zyi zintu

zyoonse zila mwaigwa kuli ndinyewe. Mpawo Ula kunamatika mu Bwami bwa Leza, kwiinda ku Muuya Uusalala, kutondezya ku inyika kuti Wa kazumina lusyomo ndo wambawida muli Nguwe. Mwa cimvwa lino?

⁷⁶ Lino, mpoonya buyo kumane eco, kwaboola sunko. “Oonse mwana uboola kuli Leza weelede kusaanguna kukomwa, kusolekwa.”

⁷⁷ Jesu, Mbwa katambula buyo buzule bwa Muuya, aa mulonga, cindi Johane naka Mu batapatiya, mpoonya buyo dyabulosi waka Mu tola mu nkanda, kwiinda mu ciindi ca kusunkwa. Pele cindi Na kabweza Ijwi lya Leza a kuzunda dyabulosi, “Kuli lembedwe. Kuli lembedwe,” Wa kapiluka mpawo kulibambilka ku mulimo Wakwe.

⁷⁸ Elyo nje nzila Leza mbwa kacita Abrahamu. Lino, Leza, nakamana kumwiita kuzwa mu cisi cakwe, elyo wa kalyandaanya mwini kuzwa ku nyika yakwe, bantu bakwe, elyo mpawo Leza waka mupa caando ca kupalulwa, mpawo komupa mwana. Mpawo wa kaselemukila ku musunko oyo wamamanino, nkoonya kunselelo ku ciindi na kacita kupa mwana wakwe mwini Izaka ku cituuzyo. Elyo Wa kati, “Mukubona kuti takalekela mwana wako alikke, Ndi lizi kuti ula Ndi yanda.” Wa kamupa musunko oyo.

⁷⁹ Mpawo kumane buyo eco, nkondo yakawinwa mpawo, Wa kati, “Elyo Lunyungu lwako luyo vuba mulyango wa sinkondo nyina.” Ameni. Nda ciyanda eco. “Uyo vuba mulyango wa sinkondo nyina.” Tula sika ku mbaakani eyo ya mamanino mu ziindi buyo zisyoonto, Mwami nawayanda. Lino Wa kajana ceeci, Abrahamu uusyomeka. Na kamana kujana Abrahamu uusyomeka, mpawo Wa kamupa cisymezyo ca kuvuba mulyango wa sinkondo.

⁸⁰ Lino okuya, ziindi zinji, oko bunji bwesu to ba Pentekoste nko bapanga bulubizi, a kuyeeya, “Ee, Muuya Uusalala wakatilwa ali ndime. Bulemu kuli Leza! Nkukoonse Nkwe elede kuba.” Peepe, munene. Uli muku talika buyo mpawo. Yebo, tacili boobo. Ngu sunko lyako a sunko lyako.

⁸¹ Mbuli buyo mbo tu jana mu—mu, omuya mu i—i—i Cizuminano Cakale; kusolekwa, kusoleka, elyo mpawo kubikka mwana. Bwana, kubikka mwana nakamana ku zyalwa kale mwana, ku zyalwa mu mukwasyi. Walo mwana, mpawo uyo sunkwa a kusolekwa, a kukomezegwa ku babanzi, a kubona obo mbwa yutuka. Elyo mpawo wabikkwa mubusena bweelene, kutandila, kuli bawisi.

⁸² Lino mbo cibede sunu. Twa kajisi myaka itandila ku makumi one ya kusunkwa kwa Pentekoste, na kwiinda, mwabona, kusunka mbungano, mukubona kuti na bayo imikila, na pe. Mukubona eco nco... Elyo, mwabona, mpaawo Mpe cijana alubo. Mubusena bwa kujatilila aa ciingano a ku Ijwi, a

kuzumanana, twa kaba ciyanza ca nyika, kulokezya nzila *eyi*, na kulosya nzila *eyi*, na kulikozyanisya kuli *eyi*.

⁸³ Mbuli mbo Nda kaamba canguzu lyoonse kulgana bantu mu bweende obu bwasunu, i banakazi kabagela masusu abo, a—a baalumi kulilemeka bumwi a zintuzyonse, a kusama buyo zisani zya bwaamu a zintu. Ndi jisi kukazya kunji loko aali eco. Pele ino ncinzi? Ci sola kufutula mbungano eyo. Ci sola ku baleta atala *awa*, ku Ijwi lya Leza, kakutakwe kulanganya eco nyika imbi nco yeelede kwaamba kujatikizya Ndilyo. Amukkale a Ijwi lya Leza. Ameni. Mwabona? Mwabona?

⁸⁴ I cintu ca ncico ngu, mbuli mbo Nda kali kwaamba masiku ainda, ba Pentekoste balindila guwo lyuungisya lyanguzu, pele baakakilwa kumvwa Jwi eelyo liniini lya butontozi. Mwabona? Kuti, lili lubide kucita zintu ezyo. Ba yeeya kuti, “Kufumbwa kuti guwo lila lyuungisya, kuli kabotu.”

⁸⁵ Pele eco tii caka kwelelezya kumvwa kwa musinsimi. I guwo lyuungisya taakwe nilya kapenza musinsimi Eliya mu mpangala. Minzumo a ndabo zyanguzu, akuti ansi, tii kwaka mmukwelelezya, pee. Pele cakamu kankamanisya kakali kajwi kaniini kabateme, kakuti cintucimwi cila kanana mukati. “Ijwi Lyangu Mbwini. Akube kuti ijwi lya muntu lyoonse libe lya bubeji, nkabela Lyangu libe bwini.” Eco nce caka kwelelezya musinsimi. Mwabona?

⁸⁶ Elyo ciciyo cicita. I Ijwi lya Leza lyoonse lila cikwelelezya muzeezo oyo wa kumuuya, nkaambo muzeezo wa Kristo muli ndinywe, oyo uuzi kuti Ijwi ndya bwini.

⁸⁷ Elyo mwa kainda mu ciindi ca kusolekwa. I mbungano yiinda mu ciindi ca kusolekwa. Muntu aumwi ulainda mu ciindi ca kusolekwa kacitana sola kuvuba mulyango wa sinkondo. Abrahamu wakainda muli ncico. Kristo wakainda muli ncico. Kristo nakamana kuzulwa Muuya Uusalala, okuya ku mulonga wa Jordano, Wa kainda mu ciindi ca kusolekwa. Nakamana kwiitwa kuti Abrahamu, waka bikkwa mu cisi cakwe omo mwa keelede kuba muzwamasi, mpawo kupalulwa, elyo Leza waka muswaana, ciindi a ciindi, nekubaboo wa kacita kwiinda mu ciindi ca kusolekwa. Lunyungu loonse lwa Abrahamu lulacita cintu nciconya, Abrahamu a Lunyungu lwakwe.

⁸⁸ Ii kabunga, mbungano, ako nkekaambo nco tu jana tubunga twesu katuwa ku nzila, ngu kaambo kakuti caboola ku kusunkwa. Ino kusunkwa nzi? Ijwi lya Leza. Ndo kusunkwa. Ijwi lya Leza ngo sunko. Sa tuyu cita eco nkamu ya bantu nco yaamba kucita, na sa tuyu cita eco Leza ncaamba kucita? Eco cili andeene.

⁸⁹ Mpaawo caka boola, mazuba aa Dwight Moody, mazuba aa Finney, Sankey, Knox, Calvin, Spurgeon, boonse bamwi babo, abo bantu basimuuya, tubunga twa katobela kumane mbabo. Bali jisi cikama ca bantu kusule okuya abo batenda nzila zyabo

muli ncico, aumwi kasyoma *ceeci* a *ceeco*, akuyungizya aniini *awa*, aku gwisya *awa*, aku gwisya aniini *awa*, mane kumalekelo baka panga kabunga kuzwa kuli ncico.

⁹⁰ Elyo cindi bacita, musyomi wini ncobeni, Leza ula boola nkoonya kubusena a kubweza muntu, muniini mubombe, kuzapasaula cintu eco. Mbubo. Lyoonse waka cicita. Leza tacinci. Misozi buyo cintu eco mu tubeela, bantu bamwi basimizeeo ya kumuuya abo bayo kkala ncobeni a Ijwi eelyo.

⁹¹ Andi mwaambile. Ndi jisi lugwalo ku ng'anda, lwa imwi ya mambungano mabotu loko, tubunga tupati mu mulimo wa Pentekoste. Oyo mwanakazi wa myoyo iityokede mucete waka ndilembela lugwalo. Elyo waa kati, "Mukwesu Branham, Nda ka samide masusu malamfu alimwi ndaka jisi makamu kusule lya mutwe wangu." Waa kati, "Elyo i... Mulumi wangu wakali kuciyanda." Elyo waa kati, "Twa kazwa ku dolopo oko nkotwa kajisi mbungano eyo yakali ya kumuuya ncobeni, mukati omo mbungano eyi mpatti, mbungano ntaanzi ya dolopo." Elyo kati, "Cindi ni twa kanjila omuya, boonse bacizi ba Pentekoste bakagela masusu abo." Elyo kati, "Ba nditobela kujatikizya ncico. Nda kati, 'Peepe, peepe. Ndi syoma kuti Bbaibbele lila twaambila kuta cita ceeco; kuba sikuubausya kucita ceeco.'" Elyo aboobo waa kaamba buyo kuti, "Elyo ba kazumanana... Ba kali kumuseka, kwaamba, 'Heyi, tayela lyako—lyako lyaponya kusule, lya sipeya lyako,' a konse mbuli oko. Elyo nda kamana mulumi wangu, mu nzila ili boobo, kusikila wa kandi sungilizya kugela masusu angu." Elyo kati, "Nda ka pegwa mulandu, kuzwa eelyo."

⁹² Amu ciyeeye, mbungano ya Pentekoste eyo yeelede kwiiminina Ijwi lya Leza! Awo mpempawo kabunga kanu mpo mutola. Mbubo. Bala kakilwa kumvwa Jwi elyo liniini lya butontozi lya Ijwi, eelyo li baita ku bwini. Boonse bali mukuswiilila ku myuuwo yanguzu, a kunji koongolola a kuzyana, kabati bajisi nguzu. Oko kuli kabotu. Nda syoma muli ceeco, ambebo. Pele, mukwesu, cindi wakonzya kuzyana a koongolola, elyo mpawo kunyona a kukaka Ijwi lya Leza, a kupona mbuli inyika, kuli cintucimwi cilubide kubusena bumwi. Mbubo.

⁹³ I Muuya wa Leza ula seluka, eelyo Jwi liniini lya butontozi, aku kulailila nkoonya kugama ku Kalivari, oko nko tufwide, a buumi bwesu buli sisidwe muli Leza kwiinda muli Kristo, a ku kwaandwa ku Muuya Uusalala. Mpawo, eelyo Ijwi lilikke lilapona awo. "Mpawo ikuti na mwa kkalilila muli Ndime, a Ijwi Lyangu muli ndinywe, amulombe eco neco moyanda alimwi ciyo pegwa kuli ndinywe." Ndoolo lwaandaano.

⁹⁴ Nda syoma Nse bonekeli kuli ndinywe mbuli sikwiindilizya. Ikuti na Mbwe bede, Nse—Nse—Nse kuzi pe. Nda—Nda syoma kuti Ijwi lya Leza Mbwini, alimwi Lye elede ku kkalilila

mpoonya awa. Elyo ikuti na Ca kkalilila awa, Ciyo litondezya Cini caanze. Ce elede kucita! Buumi bwako, bupange bwako boonse, buyooba bwandeene.

⁹⁵ Aboobo cindi Leza nakapa Abrahamu kusunkwa, wa kainda, kali peseenti iili mwaanda. Elyo inga . . .

⁹⁶ Leza takonzyi kupa kabunga kusunkwa, nkaambo kali nyongene koonse. Leza tabeleki mu nzila eyo a kabunga. Ta beleki a masi mu mukowa wa Bamasi. "Wa kagusya bantu kuzwa kuli Bamasi." Israyeli, Wa kabweza cisi. Pele, kuli Bamasi, "Wa kagusya bantu kuzwa kuli Bamasi ku kaambo ka Zina Lyakwe." Aboobo, nywebo mwabona, tacili ca bup- . . . Ta kali kabunga. Ngu mugame Ula gwisya kuzwa kuli Bamasi.

⁹⁷ Elyo cindi kusolekwa kwasika, nywebo mwabona eco cicitika? Twa kazwa ku kululamikwa. Twa katambula lubbizyo lwa Muuya Uusalala mu bweende bwa pentekoste. Pele cakaboola ku ciindi cakusolekwa, kujana basicikolo bapati bakalondolwa, bayanda kuba mbuli inyika, mbuli buyo mbo kwakabede mu mazuba a kweenda kwa Wesley a boonse bamwi babo. Ba lainka ku cikolo. Ba—ba laiya sayaansi. Elyo bala iya misyobo eyi yoonse ya zintu ziinka antoomwe a lwiyo. Elyo basola kwiiya zya kulilemeka kwa mizeezo. "Cintu buyo cibotu kwiinda, ee, utaambi eci. Aba cite eci a eco. Nkaambo ciyo . . ." Mwabona, uli mukuyungizya a kuyaka. Bukanze bwako—bwako—bwako buli lubide. Moyo wako uli lubide. Uli mukuyaka ku kabunga mu busena bwa kuyaka ku Kalivari. Mbobuti mbo konzya kuyaka ku Kalivari, kutali kuboola kwiinda ku nzila ya Ijwi?

⁹⁸ "Nkambo tula sanzigwa kwiinda ku maanzi aa Ijwi." "Amu kkale muli Ndime a Majwi Angu muli ndinywe, mpawo amulombe eco nco muyanda."

⁹⁹ Mpawo mpo tubona kuzundwa kwa kweenda kwa Pentekoste, nkaambo bala tantamuka kuzwa ku Ijwi. I Ijwi liyo amba cintu comwe; bayo sola kubamba kabunga ako kunjila omuya abusena bumwi. Elyo bayo tantamuka ncobeni kuzwa ku Ijwi eelyo, a kuli njizya moonya mu kabunga. Elyo mwabona awo mpo cakaunka? Ci tandila mbuli mambungano amwi. Pele mpawo tu zyana a koongolola, a kukanana mu myaambo, a kusotoka mujulu aansi, zyalo zili kabotu. Kabunga kabo kali kabotu. Nda syoma Nda kalisalazyza lwangu. Pele cintu ncakuti, eelyo Jwi liniini ly a butontozi ly a Ijwi kali kanana. Nce ncico.

¹⁰⁰ Yebo ulainda mu kusunkwa. Leza ula kusunkwa mbuli Mbwa kacita Abrahamu. Ula musunka Lunyungu lwa Abrahamu, mbuli nguwe. Elyo lino, kaambo nco tutabi mulyango wa sinkondo, kaambo ncokuli kunji loko akati kesu, nkaambo kakuti ta tukonzyi kuzunda kusolekwa. Elyo andi kwaambile cintucimwi, kusolekwa kwa Ijwi kuli luleme.

¹⁰¹ I kaambo nco tuta jisi, alimwi tatu kabi . . . mu kabunga. Ndi yeeya kuti Pentekoste ijisi kabunga kamwi babotu. Bamwi bantu babotu maningi Ndi . . . liko . . . bakkala aabusyi bwa nyika, bazuliwa ku—ku kabunga.

¹⁰² I Assemblisi ya Leza, Ndi jisi beenzuma omuya. Ma! Ii mukwesu moonya omuya mu Indiana, Ndiyo oba a muswaangano, Nda syoma, kulaale, ndyoonya buyo. Mukwesu Roy Weed, muntu wa cooko ca cisi ca Indiana. Nda syoma eco kuba muntu munaleza. Nekubaboo, walo muntu wa cooko ca Assembilisi ya Leza.

¹⁰³ Foosikkweya, oh, ma, mbangaye! Ralph McPherson a bunji bwa bakwesu abo, abo bali mbaalumi banaleza, kwiina cintu mu maumi abo. Balo mbantu babotu.

¹⁰⁴ Okuya muli Bumwi, eco ncoba liita kuti, Bumwi. Na, lino, Nse yeeyi . . . Ba yiita kuti mbungano ya Jesus Name. Jack Moore, kaita buyo omwe kuzwa mu . . . Kuli myaanda ya mbabo, bantu babotu, bantu babotu, bantu banaleza.

¹⁰⁵ Pele cintu ca ncico ngu, mukwesu, sa eci, cindi wajatilila ku kabunga ako. Mwabona? Leza ubweza tubunga otu, alimwi—alimwi toonse twa kazwa. Amu tulange, zyanyika zyaka njila mukati. Amulange banakazi babo. Amulange baalumi babo. Amulange ziimo zyabo. Nda konzya ku mutondekela, bantu ba Assemblies of God abo bajisi madaikona aa nkamu yabo, abo baka kwata ziindi zyobile na zyotatwe, bakambausi kaba zumanana. Banakazi amasusu abo kaageledwe, kabasama tubbudula, misila, elyo kaba caamba kuba a Muuya Uusalala, kuyaamina a bumboni bwa kwaambaula mu myaambo, na kusotauka mujulu aansi, na koongolola.

¹⁰⁶ Ba kakakilwa eelyo Jwi liniini lya butontozi lya Ijwi. Eelyo Ijwi lila kubamba kuti wa kasitikila ku ciingano. Mpe mpawo mpo ciledede. Nke kaambo tatu jisi basinsimi beni mu mbungano sunu, mbuli Agabu.

¹⁰⁷ Ako nkekambo, mbungano sunu, taba—taba bikkili maanu kwaambaula mu myaambo cindi muntuumwi akanana, nkaambo ba kamvwa zyalweeno maningi a kulilemeka bumwi, kusikila tabazi eco ciluleme a cilubide muli ncico.

¹⁰⁸ Bupanduluzi bwa tuyeyo wakuyeeyela buyo, muntuumwi kaamba buyo cintucimwi nkaambo uli mvwa kusololelwa. Obo tabuli bupanduluzi. Bupanduluzi; kutali muntuumwi waima a kukanana mu myaambo, umwi umbi wabuka mu maminiti masyoonto a kupandulula eco nea kaamba. Cindi umwi naambaula, umbi uli mukupandulula mpoonya awo, kaamba ijwi ku ijwi, bwaambe bomwe, zintu zyoonse mbubonya. *Oyu* muntu inga kasinsima, pele tabuli bupanduluzi. Bamwi babo, musyobo *oyu* wa jwi kalipa cintucimwi, eci kusule *awa* kupa cintucimwi cimbi. Elyo bamwi balati majwi ali kkumi, aumbi

waamba majwi ali makumi osanwe kunze lya ngawo, ku bupanduluzi.

¹⁰⁹ *Kupandulula* caamba “ku kwaamba, bbala a bbala.” Ikuti na ndi Ijwi lya Leza, lye elede kuboola, ijwi ku ijwi; kabala atala a kabala, kabala atala a kabala. Eyo nje nzila Ijwi mbo lyeelede kusika.

¹¹⁰ Pele ncinzi nco twa kabona? Ncalweeno kapati! Alimwi baka cicita eco, kutegwa, mucibaka ca kukkala a Ijwi, ba lekezya aco awa. Kufumbwa buyo muntu wakacita ceeco, baka mwiita kuti muna Pentekoste. Elyo mulizi eco cicitika.

¹¹¹ Cindi caboola ku kusolekwa, ciindi cakusolekwa, mpawo Lunyungu lwatalika, kula tondezya Lunyungu alutali ndulo. Lino, kakutakwe kulanganya eco cakacitika, Abrahamu waka kkala a Ijwi, cisyomezyo.

¹¹² Pele sunu kabunga taka konzyi kucita ceeco. Elyo nobamwi bakwesu bayandisi abo bazulilwa ku tubunga oto, kaimpane antuto lumwi, uyo ziba kuti kwamana kwako. Muli bongaye?

¹¹³ Ta ndaambi, mu buyake obu lino, pele mbangaye bakali mu kwiliya kwangu, mbangaye bakali a ndime, kwaamba, “Mukwesu Branham, tu lizi kuti obo Mbwini. Pele ikuti na twa tandwa awa, ino tuyu cita nzi?”

¹¹⁴ Mukwesu, ino tuyu cita nzi? Jatilila ku Kalivari, jatilila ku cisyomezyo, jatilila ku ciingano, cakatalanganya.

¹¹⁵ Elyo omuya, ba jisi baalumi bamwi babotu kapati. Mwabona? Pele eco Nce sola kucita, nku kwaamba, eco ceelede kukakilwa. Ca kakakilwa lyoonse alimwi lyoonse ciyo kakilwa. Pele nku, naa mwakakilwa na pe, a Leza, kubamba Ijwi lya Leza a cisyomezyo Cakwe, lutaanzi. Muyo sunkwa kwiinda kuli Ndilyo.

¹¹⁶ Uyo saina mapepa, kuti uyo cita *eci* na kucita *eco*. Akwalo kulgana Ijwi, uciyo saina. Mbo mbubo. Mu moyo wako, ulizi kuti cili lubide. Eelyo ndi Jwi liniini lya butontozi kali kanana, Ijwi eelyo. Ta cigambyi ta tukonzyi kuzumanana kweenda, nkaambo eco cintucimwi cakacitika. Wa kalyandaanya Iwako kuzwa ku Jwi eelyo liniini lya butontozi. Wa zuza kuzwa kufwambaana loko. Leza wakali kukwiita, pele wakazuza kuya cakufwambaana loko, nkaambo minzumo yakauma, lulabo lwakamweka, mulundu waka zungaana.

¹¹⁷ Taakwe ni cakapusya Eliya, musinsimi oyo. Wa kali kuyanda Jwi eelyo, lutaanzi. Wa kat, “Ndiyo kkala mpoonya awa.”

¹¹⁸ Banji loko sunu, bakatalika, miswaangano ya kuponesegwa, kunyama mu lweezyanisyo, misyobo yoonse ya zintu, a kunyanyamukwa oko akwalo kuta libonya mu Ijwi lya Leza. Mbo mbubo. Ino ncinzi? Twe elede kwiimba Iwiimbo olo, “Abo balindila aa Mwami. Andibombye kulisumpula kwangu a kwiitila ku Zina Lyako. Andi lindile, Mwami, kusikila Ndi

mvwe Jwi elyo liniini lyabuumuzi.” Elyo Jwi eelyo liyooba Jwi lya Lugwalo. Ciyo amba mbubonya mbuli Ijwi. Ameni. Yaa.

¹¹⁹ Kajana, Abrahamu nakamana kubikkwa, kaitwa, kapambuka kuzwa ku bayandwa bakwe, kuzwa ku mukwasyi wakwe, kuzwa ku muunzi wakwe, nkambo ka mukowa wakwe, mu nyika nyenzu. Ku lusyomo wa kacita eco. Mpawo, nkaambo kakuti wa kacita, Leza waka mupa kupalulwa, kutondezya kuti wa kali mwana wa Leza, kuti wa kasyoma muli Nguwe nkaambo wa kali kusyoma cisyomezyo. Nekubaboobo, ta kakonzya, ta kacibona cakunyama, pele wa kataminina, “Kufumbwa cintu ciimpene ku Ijwi lya Leza bwakali bubeji.” Takukwe makani obo bumboni bunji mbo buyutuka, bucili bubeji.

¹²⁰ Nda bijilwa kwaamba ceeci, pele Ndiyo elela kucita. Amulange. Elyo cindi mwatola banakazi, Ndiyo caamba ku cintu comwe eco cilibonya, inga mwabona, eco citaminina kuba a Muuya Uusalala, alimwi kutalilemeka bweelede ku—ku siya masusu abo kulampa, kuli cintucimwi cilubide kubusena bumwi. Ii mwanakazi uyosama cikobela cizulilwa ku mwaalumi, a kucisamina, cindi Bbaibblele nelyaamba, “Ngu cisesemyo kuli—kuli Leza, ku mwanakazi kusama cikobela ca mwaalumi.” Elyo mpawo utaminina kuba a Muuya Uusalala a kucita ceeco?

¹²¹ Nda kakanana aali eco buzuba bumwi mu Oregon. Kwakali mwanakazi waka ndilembela lugwalo lupati ncobeni. Waa kati, “Mukwesu Branham, uli jisi mulimo mubotu loko, pele uli masimpe ula unyonganya.” Waa kati, “Lino, ino kujatikizya . . .” Kati, “Nda sama ovolosi ciindi coonse.” Kati, “Ino kujatikizya kwiinka mu muunda kuyo bweza muunda umwi—umwi, a kusama dressi. Muta yeeyi kuti inga caboneka kabotu loko a ovolosi kwiinda mbo cinga caba, na zikobela zitegwa bangarii, kufumbwa mbo zibede, kwinda kusama dressi na?” Elyo kati, “Langa, Nda keenzya kutala mu malundu a balombe cindi niba kali kwiinka kutala ku ng’ombe, elyo,” kati, “Nda kanjila busena bwaka zwide mansenya.” Kati, “Lino, a—a dressi, bakali kunga bandika. A ovolosi taba ndipenzyi.”

¹²² Nda kati, “Oko nkuceyaloko kwiinda kasamu ka kabambwa kuzwa ku cinzinzipwa ca nkuku yakafwa nzala calufu. Luse! Ta li jisi Ijwi lyomwe lya Leza kujatikizya ncico. Oyo ngo muzeezo wako wini.”

¹²³ Leza wakati, “Akube kuti ijwi lyoonse libe bubeji, nkabela Lyakwe libe bwini.” Mukaintu wangu usama dressi. Ula bweza mu muunda. Ta jisi penzi kujatikizya ncico. Elyo, nekuba, mwanakazi tajisi mulimo a nkamu ya bantu kumasena kuya, kaembela ng’ombe, nekuba. We elede kuba mu mccoma oko nkwa zulilwa. Mbo mbubo.

¹²⁴ Ba soleka buyo kujana ntamizyo, pele kwiina. Ijwi lya Leza lili aantangalala, a mwanakazi oyo wakazyalwa ku Muuya wa

Leza uyo cita. Elyo muntu wakazyalwa ku Muuya wa Leza taka lekeli mukaintu wakwe kulilemeka mbuli boobo. Ino Wa kaamba nzi? "Oyo ubweza, uugela masusu aakwe, ulaubausya mutwe wakwe." Elyo mulumi wakwe mutwe wakwe. Ula ubausya.

¹²⁵ Ncibotu ndaumuna. Ncibotu. Lino, mwabona, mwabona, oko nkunji. Nywebo mulizi eco Nce kanana.

¹²⁶ Ta ndaambi ceeeo kwiinda mu makanze mabi. Ikuti na Nda amba kuti kwiinda mu munyono, Leza koba a luse ku moyo wangwa zibi; andi selemukile awa aa cipaililo eci, kweempwa.

¹²⁷ Nda caamba nkaambo, beenzuma, Nda muyanda. Elyo Ndi sola ku mwaambila kuti obo mbwini, alimwi eelyo ndi Ijwi lya Leza. Twe elede kumvwa Jwi eelyo liniini lya Leza, ku kweeleka ku Ijwi. Tuya kwiinda mu ciindi ca kusolekwa. Aleluya!

¹²⁸ Sena mula mvwisya kuti kumane kusika ciindi eco cakusolekwa obo bubanzi bwa mwana oyo waka zyalwa mu kabunga kamukwasyi? Ikuti na wa akuzunda kusolekwa aku kkalilila a kuyandisywa kwa wisi, mpaawo oyo mulombe waka gusigwa alimwi wa kasamikwa cikobela, alimwi mpawo kwa kacitwa pobwe. Elyo mulombe oyo waka bikkwa mpawo mu mukwasyi omo mwa kazyalilwa mo.

¹²⁹ Eelyo nde penzi kuli ba Pentekoste besu sunu. Ba sotauka buyo *awa a kokuya*, elyo tubunga twesu inga twa bakwelela nzila *eyi* a nzila *eyo*. Taba kkali a Ijwi.

¹³⁰ Ikuti na mwakkala a Ijwi, nkokuti Leza, mukubona, "Ikuti na mwa kkalilila muli Ndime, a Ijwi Lyangu muli ndinywe," Lyakwe, Ta konzyi ku Li kaka. Ndi Ijwi Lyakwe. Mpawo kuyooba ciindi, ciindicimwi, elyo uyo gusigwa a kubikkwa ambali, a kupegwa cintucimwi eco ca kasimpe, aleluya, nguzu zya Leza Singuzuonyonse.

¹³¹ Kwalo, Leza ulindila bana Bakwe, pele taba keendelezyi buyo, cindi baboola ku ciindi eco cakusolekwa. Sa ula cizumina? "Ee, mbungano iyo nditanda." Yaa. Mpaawo we. Mpawo, koya. Olo taluli Lunyungu lwa Abrahamu. Lunyungu lwa Abrahamu talu lilemeki mbuli boobo.

¹³² Lunyungu lwa Abrahamu! Lino, Ta ndikwe makani eco ciboola kwiimpana kuli Abrahamu, wa kakkala ncobeni a Ijwi eelyo lya cisyomezyo, kakkala buyo ncobeni a ndilyo. Takukwe makani obo Sarah mbwa kaboola, bamwi bakaboola, bamwi bandeene bakasika, zintu zyoonse, wa kacibala mbuli kuti tii cakaliko. Wa kalanga, wa kasyoma kuti wa kali kukonzya kubona cisyomezyo, nkaambo Leza waka cisyomezya kuli nguwe, alimwi nkukoonese kwakaliko kuli ncico. Lya kali Ijwi lya Leza, kakkala ncobeni muli nguwe.

¹³³ Mpawo Wa kamupa kusunkwa oko kwa mamanino. "Ndiyo mupa caabilo cabubili, akusola." Lino, uli jisi kale mwana. Uli bwene kuti uli jisi oyo. "Pele lino Ndila mwaambila kuti,

‘Kobweza mwana oyo kutala a kuyo mujaya.’ Elyo lekela mwana oyo, cindi a bona . . . Sa uyo jaya mwana oyo? Njo sola lino.”

¹³⁴ Abrahamu, masimpe ku Ijwi! Mbobuti, cindi wa tambula cisyomezyo, mbobuti mboya kulesya cintu? Mbobuti, mbobuti mboya kucita?

¹³⁵ “Mbobuti mbo moyoosola kulangila kuba wisi wa masi, elyo mpaawa muli myaka iili mwaanda a kkumi ayosanwe yakukomena eno? Abra- . . . Izaka Muniini, kutandila myaka ili kkumi ayone, kkumi ayosanwe yakukomena. Mbobuti mboya kuba taata wa masi kakuli uli myaka ili mwaanda a kkumi ayosanwe yakukomena? Ngooyu mwana wako alikke, alimwi unyonyoona bumboni bwako bulikke obo mbo jisi.” Ameni.

¹³⁶ “Mbobuti Mbweyo cibamba ikuti na Nda zwa mu kabunga kangu? Mbobuti Mbweyo cibamba ikuti na Nda cita *ceeci*? ” Oh, amuswiilile ku Jwi eelyo liniini lya butontozi a kuboola ku Ijwi, Ijwi.

¹³⁷ Yebo wati, “Nda kamvwa jwi kandaambila *ceeci*.” Ikuti na ciliimpene ku Ijwi, tii lyakali Jwi lya Leza. Jwi lya Leza liboola ku Ijwi.

¹³⁸ Mpawo Abrahamu wakeenda nkoonya kumbele okuya ku Jwi, elyo nekubaboo, Jwi liniini lya Leza, ku Ijwi lya Leza, lyeelede kubweza buumi bwa mwana wakwe wini.

¹³⁹ Wa kati, “Kokkala janza lyako, Abrahamu. Ndi lizi ula Ndi yanda lino. Elyo boonse abo bakutobela, aleluya, boonse abo baboola kutobela nduwe, abo bali bambilide ku bweza Ijwi Lyangu, lu yooba Lunyungu lwako, alimwi awo uu yoo vuba mulyango wa sinkondo.”

¹⁴⁰ Ni Nda konzya kuba aciindi caku mwaambila cintucimwi eco cakacitika mazuba masyoonto ainda, mwabona, eco caka citika. Oh, ma!

¹⁴¹ “Uyo vuba mulyango wa sinkondo; Lunyungu lwako kutobela nduwe. Abrahamu, oyo ukuleleka uyo lelekwa, alimwi nguni ukutuka uyo tukwa.” Jesu wakati, “Ncibotu ku lampi lya kalengelelwa mu nsingo yako, a kunyikizya kunsi lya lwizi.”

¹⁴² A tubunga otu tusandula bantu abo banaleza, nkaambo ba kabweza kwiima kwa Bwini, Ijwi, a Muuya a nguzu zya Leza, a kukkanala a Ijwi, mula bona eco cakacitika? Wa kanyikila mu lwizi lwa kuluba.

¹⁴³ “Ncibotu bbwe lyaziyo lya kalengelelwa aa nsingo yako, a kunyikizigwa kunsi lya lwizi, kwiinda akwalo kulebya basyoonto aba Bantu bananikidwe.” Ino mbaani? Lunyungu lwa Abrahamu luyo kkala a Ijwi lya cisyomezyo.

¹⁴⁴ Amwi mambungano esu ali mukusika ku busena nko bakaka. Bala kaka kuponesegwa kwa Buleza. Taba ciyandi limbi mu mbungano yabo. Mbo mbubo. Tubunga twesu twa Pentekoste tatu ciyandi limbi kuponesegwa kwa Buleza. Ino ncinzi? Sena

tamu boni obo dyabulosi mbwa beleka? Wa kasika okuya a kwaamba zintu zimwi zyalweeno antomwe mbuli boobo. Elyo bantu buyo bapampu kaba yeeya kuti mbasimuuya, a kulanga eco, a kwaamba, “Amulange *oyo* umwi. Amulange *oyo* umwi.” Nse langide ali oyo.

¹⁴⁵ Ikuti na uli Lunyungu lwa Abrahamu, uyo langa ku cisyomezyo ca Leza, eco Leza nca kaamba kucita kujatikizya ncico. Nce ncico. Lunyungu lwa Abrahamu, tu langa cisyomezyo. Ta ndikwe makani na mbangaye bawida mu nzila *eyi* a mbangaye bawida mu nzila *eyo*. I cisyomezyo cicili bwini.

¹⁴⁶ Yebo weelede kuboola kwiinda mu kusunkwa oko. Mwabona? Iiyi. Abrahamu, wakasunkwa lutaanzi, elyo mpawo wakanamatika, mpawo wakapa cisyomezyo kuti “Lunyungu lwakwe lweelede kuvuba mulyango wa sinkondo.” Nda ciyanda eco. Mpawo, ba kavuba milyango ya sinkondo nyina niba kamana kusunkwa.

¹⁴⁷ I cintu ca ncico ngu, ta tukonzyi kuzunda kusunkwa. Aako nke kaambo tubunga twesu nco tutakonzyi kuzunda kusunkwa. Ta luli luyando lwa Leza. Ngu, Leza waka cileleka, pele taluli luyando lwa Leza. Nkaambo, mwabona, muli jisi nkamu yoonse ya bantu kuno a mizeeo yoonse ya mizeeo, elyo bala bayobolola antoomwe akujana ciinda ncoba konzya. Bamwi babo bakati, “*Oyu* muntu mupati. To konzyi kukaka ijwi lyakwe.” Ee, eyo nje nzila njionya mbungano ya Katolika mbo ibunganisigwa, cintu nciconya, aa nkamu ya basyomi bapampu. Bapampu, bala cilanga, kaceendelana a ziindi. Yebo tokonzyi kucita eco. Zintu zyoonse zimbi mbubeji pele Ijwi lya Leza.

¹⁴⁸ Abrahamu taakwe nakalanga ku cintu comwe cita cisyomezyo ca Leza. Kakutakwe kulanganya eco cakaliko, wa kakkala a cisyomezyo ca Leza.

¹⁴⁹ Mpawo ako nke kaambo tatuci jani kunji. I kabunga takakonzyi kuvuba mulyango wa sinkondo. Kuli mizeeo minji maningi inyongene omuya.

¹⁵⁰ Weelede kubweza muntu amuntu, oyo uuvubide mulyango wa sinkondo. Inga wacicita ikuti na ulayanda. Iiyi, munene.

¹⁵¹ Atu sole masyoonto, kwa maminiti masyoonto, kubona ikuti na ba kkala mu Lugwalo.

¹⁵² Lino, kwakali ciindi kumusanza mu Babuloni cindi nokwakali ii–ii cinkozya cakabambwa, cikozyanyo cibotu ca mbungano ya Katolika, aboonse bata kakotamina cikozyanyo eco ba keelede kuumpwa mu bbila lya mulilo. Lino, cakali kazekelo, naa bayo kkala, cindi Leza na kati, “Muta kabi a tuleza tumbi pe kumbele Lyangu, na kupanga cinkozya ca cintu cili conse.” Eco ncencico Leza nca kaamba. I kazekelo kakasika.

¹⁵³ Boonse bamwi ba Israyeli bakawida moonya mukati. Elyo cindi mweembo niwa kaila, alimwi i–i mulozi twa kalila, a i–a

cinamoondonga nakalila, baa, boonse bakawa ansi kakutanaba cinkozya eci.

¹⁵⁴ Pele kwakali botatwe babo bakati, “Taakwe cintu cakali kucita.” Ba kamvwa Jwi eelyo liniini lya butontozi, nkabel a baka kkala mu kweendelana a Ijwi. Ino bakacita nzi? Kakkala a Ijwi.

¹⁵⁵ Elyo kumane, ba—ba—ba kati, “Ikuti na to ciciti... Tuyo mupa ciindi cimbi, nepe tuyo musowela mu bbila lya mulilo.”

¹⁵⁶ Kati, “Leza wesu ula konzya kutuvuna kuzwa ku bbila lya mulilo.” [Kabeela katakwe cintu aa teepu—Mul.] “Pele, nekubaboo, tuyo kkala a Ijwi.”

¹⁵⁷ Lino, mukwesu, ino kujatikizya nduwe? “Ino Nda cita nzi, Mukwesu Branham?” Kokkala a Ijwi. Amukkale a cisyomezyo. “Mbungano yangu yoonse iyozwa kuli ndime.” Amukkale a cisyomezyo. Beelede kuyabaala, kuzwa buyo buzubabumwi, nekuba. Pele, Leza takaciti. Amukkale a cisyomezyo. “Ee, Nda kwaambila, bayo nditanda.” Kokkala a cisyomezyo, mbubonya buyo. Ko kkala ncobeni a cisyomezyo. Lino, ikuti na mwakonzya kukkanala a cisyomezyo a kukkanala awo, kukkanala ncobeni ambabo mpawo.

¹⁵⁸ Luswaanano a bantubonse. Pele lino awa, lino, tamu kakonzyi kuli janina nzila imbi kunze lya kuba aluswaanano a bantu boonse. We elede kucita. Lino, cindi ba kabija loko, bala lilemeke kabotu, mpawo tantamuka kuzwa kuli ncico. Mbo mbubo. Uta njili mu cooko ca sinkondo. Pele kufumbwa kuti koli mukusola kuwina munyoko, eco ciliindene. Mwabona?

¹⁵⁹ Lino amulangilile. Pele tamu kakonzyi kuwina muzeezo wa kabunga, muntu omwe. Peepe, munene. Kakuli, bali jisi mulao wabo ulibambilidwe, “Tula syoma *eci*, mwaakwe!” Ikuti na inga mwalemba njiisyo yanu, “Tula syoma *eci*,” lulalano, inga caba candeene. Ii mwaakwe caamba kuti, “Tula syoma *eci*, alimwi weeblede kusika kuli *eci* akusaina pepe eli, na nkukoonse kwa ncico.”

¹⁶⁰ Pele ikuti na wati, “Tula syoma *eci*,” lulalano, “a kusanganya kunji mbuli mbo tu konzya kwiyia kuzwa kuli Leza. Tuli libambilide ku Muuya Uusalala,” mpawo uyo zumanana, mukwesu. Iyi. Eco ciyooba caandeene lino.

¹⁶¹ Pele, nywebo mwabona, ikuti na mwa kacilemba a mwaakwe, nkabel a Leza wapa cintucimwi cimbi ciboola, cila tondezya kuba Ijwi Lyakwe, Bwini, tamu konzyi kweenda, nkaambo calo “nciindi.” Eco cila cigozya. Awo mpe mpawo ba Lutherani mpo bakafwida. Mpe mpawo ba Methodisti mpo bakafwida. Mpe mpawo ba Baptisti mpo bakafwida. Mpe mpawo ba Presbyteria mpo bakafwida. Elyo mpaawo ba Pentekoste mpo bali mukufwa. Mbo mbubo. Mbo mbubo. Bala fwa mpoonya alya, amulange buyo, nkaambo cili—cili lembedwe kale. Taakwe cintu nco—nco konzya kuyungizya kuli ncico na kugwisya kuli ncico. Nko—nko cili. Eyo nje njiisyo yanu.

¹⁶² Lutherani tii yakakonzya kuzumina kusalazigwa. Peepe, munene. Wa kati, “I baluleme bayo ponena ku lusyomo.” Kutali Martin Luther; pele eyo nkamu yaka mutobela. Mbo mbubo.

¹⁶³ Kutali John Wesley; pele nkamu yaka mutobela. Mbo mbubo.

Kutali Calvin; pele nkamu eyo yaka mutobela.

¹⁶⁴ Kutali John Smith wa mbungano ya Baptisti, oyo waka komba canguzu loko, ciindi ca masiku, mane meso aakwe aka sumbwa kuti ajalilwe, nkambo ka mbungano yakwe; alimwi mukaintu wakwe ulelede ku musololela ku busena a kumu sanizya conco, ku tafule. Kutali nguwe; pele nkamu eyi yaba Baptisti ii mutobela, kabunga ako kaboola kunze lyakwe.

Kutali Alexander Campbell; pele abo baka mutobela.

¹⁶⁵ Kutali mulimo wa pentekoste ku matalikilo, oyo waka jisi zintu zyoonse zikozyenye, a kuba aluswaanano a bantu boonse; pele inkamu zya kasika akuti, “Peepe. Tuli *boobu*, alimwi tuli *boobu*. Elyo *otu* twaambo, alimwi eco nceeco!” (“Kulyandaanya lwabo, kulibonya kutaba a Lusyomo.”) Ncibotu. Eco nce cakacita. Nceeco cintu cibyaabi. Ameni. Nda limvwa cabukombi, cifumo cino.

¹⁶⁶ I bana ba Hebrayo, niba kamana kuzunda sunko, naa bayo kkala ku Ijwi lya cisyomezyo, na pe, ba kabikkwa ku kusoleka. Elyo ncinzi ncoba kacita? Ba kavuba mulyango wa sinkondo. Ameni. Nkaambonzi? Ba kakkala aa Ijwi.

Amukkale a Ijwi, eelyo Jwi lya Leza likanana kuli ndinywe.

¹⁶⁷ Lino, kaambo koonse kati, “Lino, langa. Babuloni, inga tii caba candeene. Nkaambo, swebo, cindi twa fugama kumbele lya cinkozya eci, tu komba Leza, nekuba. Ee, ikuti na twa cicita nzila *eyi*, tu caamba nzila *eyi*.”

Amu cicite nzila Leza mbwa kaamba.

¹⁶⁸ Ino kuti Leza nakati, “Musa, samununa mabbusu aka, Musa. Uli aa busena busalala.”

¹⁶⁹ Wa amba, “Ndaku Lumba, Mwami. Nda syoma ncobeni muli Nduwe. Ndiyo samununa buyo ngowani yangu, mubusena. Ndi penzi maningi lya kwaanzika bbusu lyangu.” Uh huh. Huh! Inga tii cabeleka.

Wa kati, “Mabbusu.” Ta kaamba kuti “ngowani.” Yaa.

¹⁷⁰ Yebo weelede kuboola, kweendelana a mundando, eco Leza ncaamba, a kweendelana a Ijwi Lyakwe.

¹⁷¹ Lino, niba kamana kuba a kusunkwa, ba kavuba mulyango wa sinkondo wa mulilo. Ba kajana kuti, cindi niba kaunka nkoonya kunselelo ku mamanino, kukkala aa Ijwi lya Leza, ba kavuba mulyango. Mbo mbubo. Kumane . . .

¹⁷² Daniele. Kwakali kuzibya kupati kubuleya kwakamwaika, a kusaina kwiinda kuli ba Medesi-o-Persia, abo bakatali

kukonzya kucincwa, kuti, "Ikuti na umwi wakakomba kuli kaleza kali koonse, abe a kasowelwa mu bulyango bwa balavu." Elyo Daniele wakalizi kuti Ijwi lya Leza lyakaliko, ku komba kuli Nguwe luzutu, aboobo wa kajula buyo mpulungwido a kukomba nekuba. Lino, taakwe naka joka mu kkona. Wa kajula mpulungwido ku tempele. Kwiina naka fwabweeme kuli ncico.

¹⁷³ Elyo ta tuyandi kucita bukombi bwesu Munsondo, a mu Muvulo kucita cintucimwi cimbi. Na, syoma mu moyo wesu cintu comwe, kuboola kumbele lya muntuumwi umbi a kwaamba, "Ee, Ta ndizi. Inzya, Ndi yeeya kuti uli luleme." Koba obo mbobede. Toli obo, kozwa mu cikambaukilo, kozwa mu mbungano. Mbo mbubo. Nkaambo, mula nkoloto kuli bonse. Kokkala obo mbobede. Kwaamba eco nco syoma, mpawo to jisi cintu ca kuleka. Yebo uliimvwi ncobeni eco cili bwini. Bantu boonse balizi bube bwanu ncobeni. Bantu bayo kulumba, kufumbwa muntu.

¹⁷⁴ M wanakazi inga kagalankene mbuli koonse. Kwayanda mupati, uneneede, muniini, ukotede, wamasusu asiya kumutwe, meso abbulauni, meso abbulu, meso agileyi; imwi, nzila imwi, a umwi imbi. Pele ikuti na mwanakazi oyo ulasalala, mulindu, takukwe mwaalumi mu cisi cita oyo unga wabweza ngowani yakwe kuli mbabo, uli jisi kampandu ka bube muli nguwe. Yaa. Nkaambo, walo—walo uleta obo mbwa bede, a bantu bala cilumba.

¹⁷⁵ Aboobo Leza uyo lumba muntu oyo uyooba obo mbwabede, na bantu abo bataminina Bunakristo. Atube Banakristo, bazwide Muuya Uusalala, a Ijwi lya Leza, na kuluba kujatikizya ncico. Ncibotu. Nkaambo, bumbi, ulaba kuupaupa, a kupona buumi bwandeene. Elyo bantu bala kubona ko zuzila awa ku zizyano, a kufweba, a zintu mbuli ezyo, a kutaminina kuba Munakristo, mpawo, mwabona, wabikka cilebyo mu nzila imwi.

¹⁷⁶ Mwabona nywebo no banakazi, ziindi zimwi, obo mbo bagela masusu abo a kusama a kulilemeka mu madressi aya aakaindi, kulibonya mbuli sosegì na cintucimwi, akuunaka mu tugwagwa, kweendauka konse, tusindi tutandila kulampa *obo*, kuya busyansyaila mu tugwagwa. Sa oyo ngwa ppentekoste? Mpawo i—i mambungano amwi alaamba, "Ba taminina kuti bajisi cintucimwi eco ncoba tajisi."

¹⁷⁷ Uli namatikidwe a kweengedwe aa Muuya Uusalala. Toli mu hoolo ya kuzyanina sunumasikuaku gwambatila maboko a mwaalumi umwi, oyo tali mulimi wako; busiku bwakatobela, a kujoka ku mbungano a kuzyana koonse ku busena. Eyo taili pentekoste. Oko nkuupaupa. Obo mbusofwi.

¹⁷⁸ N se caambili ndinywe kapati. Pele, mula mvwisya, mateepu aya akapangwa okuno alainka ku inyika yoonse, aboobo Ndi kambauka buyo mbuli ku inyika yoonse. Cindi Nda mvwa Leza kaamba, "Kwaamba cintu cimwi," Nda caamba buyo, nkaambo

Ta ndizyi oko nko ciya. Eco cili kuli Nguwe kumamela ceeco. Amukkale buyo a Ijwi. Mbo mbubo. Yaa.

¹⁷⁹ Peepe, Daniele taka fugama ku kwaambilizya kwabo kupati, naa wakatandwa kuzwa ku kabunga na pe. Wa kakkala mpoonya aa mpulungwido, a kukkala a Ijwi lya Leza. Kwiina naka fwabweeme kuli Ndilyo.

¹⁸⁰ Ncinzi cakacitika? Ba kamusowela mu bulyango bwa balavu, pele wa kavuba milyango ya balavu mu bulyango. Nkaambonzi? Bulemu! Nkaambo kakuti Leza wakati yakwe... “Mbuto yako iyo vuba mulyango wa sinkondo.” Kufumbwa obo sinkondo mbwabede, muli jisi mulyango. Oh, mbobuti ziindi zinji mbo tukonzya...?

¹⁸¹ Amulange Musa, katabela mu nzila ya milao ya Leza, kaselemukila mu Egepita, kuboneka mbuli kuti zintu zyoONSE zyakaliimpene. Wa kajisi basikuli kozyanisyamwi bakaunka a nguwe. Wa kaselemuka a zitonezyo zimwi—zya zitonezyo, kutondezya kuti wa katumwa. Kawaala nzoka ansi, azimwi zimbi mbuli ezyo.

¹⁸² Eyo mbaaba basika basikuli kozyanisyamwi ambali, baka sowela ansi yabo. Ncinzi nca kali kukonzya kucita? Taakwe. Leza taakwe naka mwaambila kuti bayo cita ceeco. Wa kali kuyanda kusunka Musa. Wa kali Umwi Oyo waka zumizya Janesi a Jambre kuwaala nzoka zyabo, na mabolubo abo.

¹⁸³ Aboobo mpaawo kwakaimvwi Musa mu bulizi bwa mulimo. Kawaalila ansi musako wakwe. Wa kasanduka kuba nzoka. Wa kati, “Langa aali eco, Farao. Eco ncecico Mwami wangu nca kandaambila kuboola, kocita kumbele lyako.”

¹⁸⁴ Farao wa kaamba, “Koboola kuno, Jambresi a Janesi.” Ba kawaalila ansi mabombo abo. Ba kasanduka kuba nzoka, ino Musa wakacita nzi.

¹⁸⁵ Sena busyu bwakwe bwakali kusubila? Peepe, munene. Wa kacili kusyoma kuti Leza waka mutuma. Wa kakkala a cisyomezyo eco. Elyo ncinzi cakacitika?

¹⁸⁶ E co nce cindi noli kumbele lya miswaangano yanu imwi ya baiminizi. Busyu bwako inga bwapa kusubila, aniini. Amukkale a Ijwi.

¹⁸⁷ Ncinzi cakacitika? Mpoonya buyo, eyi impa ya Musa ya kaboola koonse a kubamena. Leza waka simpikizya. Kumane sunko lyakwe, wa kati, “Ndi yanda ndinywe, kwiinda ku citondezyo eci, kulekela bana kuunka kulaale. Ndi yanda kuti ubatumine kujoka ku ng’anda, oko nkoba zulilwa. Leza wakaseluka awa akwaamba, kandi tumina anselelo awa kuyo bavuna. Ndi yanda kuti bajokele.” Wa kawaala ceeco kunselelo okuya.

¹⁸⁸ Oh, musunko wakasika. Musa, eco ncoyo cita, ko cenguluka, koenda kuzwa, kwaamba, “Ee, kwayanda Nda kalubizya”? Peepe, munene.

Musa wakaima mpoonya awo, “Leza wakatuma eci.” Bulemu!

¹⁸⁹ Leza waamba kufumbwa cintu, kokkala a Ncico. Takukwe makani eco cicitika, kokkala a Ncico. Ikuti na ba kutanda a kwaamba, “Ta tuko beleka antoomwe, ta tukaciti *eci*,” amu kkale a Ncico.

¹⁹⁰ Musa wakakkala ncobeni a ncico. Ncinzi cakacitika? Wa kavuba mulyango wa sinkondo nyina. Aleluya. I dyabulosi wakati, “Ndiyo lampa Lwizi Lufwide kumbele lyako,” pele lwa kajuka. Tiiba kali kukonzya kubabamba mu Egepita limbi. Wa kavuba mulyango wa sinkondo. Nkaambonzi? Nkaambo wa kakkala a kutumwa Leza nkwa kamupa. I milao ya Leza, wa kakkala a Ijwi ly a Leza alimwi wa kavuba milyango ya sinkondo.

¹⁹¹ Joshua, nakamana kwiinda mu kusunkwa. Wa kali kumusanza okuya, antela, a kuyobolola kulanduka Jordano, walo a Kalebi, a basikutwela. Cindi na kapiluka kuzwa ku Jordano, bakasika ku Kadeshi Bania. Elyo boonse babo bakati, “Oh, ikuti na twa talika, eco ciyo tyolaula tubunga twesu mu tubeela. Ta tukonzyi buyo kunjila.”

¹⁹² Oyo muuya taufwi. “Oh, ta tukonzyi kuba a Ceeco. Ikuti na twa yiisy Ceeco ku bantu besu, ino tuyu cita nzi? Twa kali kunga twaswena munsi loko akati ka bamadaikona, mu mbungano, kumasena. Bali kwetene ziindi zyobile, ziindi zyotatwe. Ino tula cita nzi? Swebo, baa, ikuti na twa kaambilan banakazi besu kuti beeleder kuba a masusu malamfu, mulizi eco ncoba kalino cita? Ba kali kusiya mbungano. Elyo ncinzi nco tunga twacita? Baa, inga twa yeeyelwa buyo kuba ciyanza cakaindi.” Jesu wakali ciyanza cakale, acalo. “Ta tukonzyi kucita eco. Ta tukonzyi kucita eco. Caindila maningi kuli ndiswe.”

¹⁹³ Nywebo mulizi obo musyomi wakuzina buyo mbwa jana. Bahebrayo, cipati 6, cipandulula eco. “Oyo waka munikilwa kale, kabambwa kuba basicaabilo ca Muuya Uusalala, mpawo wakawa, kulibukulusya mwini alubo.” Wa kaboola ku munyinza oyo a kukaka kuunka okuya, nce ncico, waakaka kusyoma cakumaninina.

¹⁹⁴ Nkaambo, ino Kalebi wakacita nzi? Ino Joshua wakacita nzi? Wa kati, “Tula konzya loko kwiikona.” Nkaambonzi? Ba kakkala aceeco Leza nca kasyomezya.

¹⁹⁵ Baa, ba kati, balo bamwi bakati, “Ee, balo mabbabbani. Ba kaba a malambo onse. Bali munzila *eyi*. Baa, tii twa kakonzya kubaguma, mu nzila ili yoonse.”

¹⁹⁶ Joshua wakati, “Tula konzya maningi kucicita. Amuumune, nywebo nobantu! Amuumune! Amu kkale!” Ameni.

¹⁹⁷ Nda mwaambila, lusyomo luli mu cintu cipati maningi, cindi caboola aa Ijwi lya Leza. Ta yoowede mpawo. Lusyomo lujisi masusu aa kaango, milambi mipati. Lu lati, “Koumuna!” Zintu zyoonse zimbi zila tontozya ku kkona, mbo mbubo, cindi Leza akanana. “Mwa kkalilila muli Ndime, a Majwi Angu muli ndinywe, kwaamba eco nco moyanda.” Mpaawo we. Oh, Nda ciyanda eco. Humu!

Madaimona ayo kankama, a basizibi bayo
sinsimuka;
Lusyomo muli Jehova luyo zungaanya cili
coonse.

¹⁹⁸ Mbobuti mbo konzya kuba a lusyomo kakuli ulizi kuti tobeleki, kweenda mu Ijwi Lyakwe, cindi waziba kuti kuli zintu omuya nzo elede kwaamba nkabela to zyaambi? Kuli zintu nzo mweelede kuyiisya nkabela tamu ciyiisyi. Kuli zintu nzo takonzyi kwaamba, aboobo mbobuti mbo konzya kuba a lusyomo kakuli ulizi kuti uli lubide?

¹⁹⁹ “Ikuti na moyo wesu tau tupi mulandu.” Nceeco we. Nceeco we. Pele amukkale a Ijwi eelyo, awo aatakwe mulandu. “Taakwe kuzulwa kuli baabo bali muli Kristo Jesu, abo bateendi mbuli kunyama pele mbuli Muuya.” I Muuya ulasololela a Ijwi, nkaambo Muuya ukonzya biyo kuzwa ku Ijwi, nkaambo Ijwi Lyakwe Muuya. Elyo Ci konzya buyo... I Muuya wini wa Leza ukonzya biyo kukanana Ijwi lya Leza. Oh, ma! Ma, ma!

Ko zwa, nyika. Saatani, ko tusiya.

²⁰⁰ Muta yoowi kwaamba ku dundu eli, “Ko zyuka.” Ko caamba. Kokkala awo, langilila kulumbuka kwakwe. Mbo mbubo.

²⁰¹ Pesi na ujisi kupegwa mulandu kumwi okuya, yebo ncibotu—ncibotu waumuna buyo. Ula balika buyo mpawo. Toli mu kwaamba bwini. To ambi zintu nzo elede kwaamba. Yaa.

²⁰² Tu jana kuti mpawo Joshua oyo, nakamana kwiinda mu kusunkwa oko, wa kabona bumboni bwa nyika mbotu, elyo wakaima kuya ku Kadeshi-Barnia a kukkalikila kuli boonse babo, a kuti, “Tula konzya loko kwiikona. Tula konzya kwiitola.” Ino wakali muzeezo nzi? Zabuka.

²⁰³ Ino muzeezo nzi wa Musa? “Tondezya citondezyo eci a kugwisya bana.” Elyo caka boneka mbuli kuti caka kakilwa. Pele wa kakkala a Ijwi, a mulyango wa Lwizi Lufwide tii lwaka konzya ku mujata. Wa kazumanana ncobeni kwiinda muli ncico. Wa kavuba mulyango wa sinkondo.

²⁰⁴ Joshua, kalanga ku cisymezyo ca Leza, kati, “Tula konzya loko kwiikona.” Mbo mbubo. Elyo cindi naka selemukila ku Jordano, ncinzi nca kacita? Waa kapa mweenya. Ameni. Nce ncico. Wa kavuba mulyango wa sinkondo. Oyo Jordano

wakali kumu tantamuna kuzwa ku kwiinka okuya a kubweza cisyomezyo eco. Pele cindi naka selemukila okuya, wa kali Lunyungu lwa Abrahamu. Nkaambonzi? Wa kasyoma Ijwi ly a Leza. Eyo nje nzila ilikke njo konzya kuba Lunyungu lwa Abrahamu, nkusyoma Ijwi ly a Leza. Elyo mpawo ncinzi nca kacita cindi na kaselemuka oko nkwa kali libambilide kubweza sinkondo? Leza waka jula mulyango, nkabela wa kauvuba, wa kautola, kainka abusena.

²⁰⁵ Cindi nkondo ntaanzi, kuzwangana kwakwe kutaanzi nkwa kajisi ambabo, malambo akali mapati loko cakuti bakali kukonzya kwiinzya muzundano wa nkalaki atala ali ngawo. Mbobuti mbwa njila ku zibweza? Ba ka tija kuzwa kuli nguwe, baka joka mukati. I sinkondo uyo cita, awalo. “Pele uyo bweza mulyango wa sinkondo.”

²⁰⁶ Kati, “Mwami, ino Nde elede kucita nzi?” Wa keenda koonse, masikati amwi, kayeeyayeeya. Wa kabona Muntu kaimvvi a cceba Lyakwe kali dulowing’idwe. Joshua waka somona panga lyakwe, kati, “Sena Uli wesu? Sena Nduwe nkambo ka sinkondo wesu?”

Wa kaamba, “Ndime Silutwe wa nkamu eyi.”

“Ino Nde elede kucita nzi?”

²⁰⁷ “Amu maccing’e kwiizunguluka, ziindi zili kkumi azyotatwe. Amulizye mweembo. Muyo bweza mulyango wa sinkondo.”

²⁰⁸ Waa kawida ansi. Iiyi, munene. Nkaambonzi? Wa kali Lunyungu lwa Abrahamu, lwa kabamba Ijwi ly a Leza. Wa katola mulyango onse wakasika kuli nguwe. Cilimasimpe.

Ciindi ciya bumana. Nde elede kuleka.

²⁰⁹ Amulange, boonse aba basintaze bayandisi, bajisi peegi lizwide mbabo kalemba aapepa awa. Pele boonse aba basintaze bayandisi, zintu nzoba kacita, kumalekelo ba kafwa.

²¹⁰ Pele mpawo kwa kaboola Lunyungu lwini lwa lusyomo, Lunyungu Lwabwami ilwa Abrahamu, Jesu, cisyomezyo. Abrahamu waka jisi Izaka, masimpe, kunyama, pele Lunyungu lwini tii lwakali mu ciyanza eco ca kabunga. Cakali mu cisyomezyo eco ca Ijwi ly a Leza, kuti Uyo mubamba kuba wisi wa masi, kutali kwiinda muli Izaka, pele kwiinda mu Lunyungu Lwabwami, Jesu. Olo lwakali Lunyungu Lwabwami, luli, mubwini, Lunyungu lwa Abrahamu, Jesu, takali mu Juda, naanka kuti Wa kali Munamasi. Wa kali Leza. Mwabona? I... .

²¹¹ Nywebo noba Katolika awa, longezya moyo wanu. Pele cindi wakomba Maria mbuli kaleza kanakazi, ino ndi penzi nzi kuli nduwe, akwalo? Maria takali cintu pele mwanakazi. Leza waka musala. Waa kali cikumbilo. Kwa mana. Ii cikumbilo, obo mwanakazi mbwa bede, pele uli swaangene a mbuto ya mwaalumi.

²¹² Pele, ndi bbunga lisangene, pele Nde elede kwaamba cee ci kutegwa mumvwisyé eco Nce kanana. Lino, ko swiilila kuli dokotela wako—wako, alimwi Ndili munyoko. Masimpe, inga wacita.

²¹³ Maria taka jisi poleni muli Kristo. Kwakanyina kulimvwa kwankwela cindi Muuya Uusalala niwaka muvunikila, nokuceya. Pele Leza Singuzuzyonse, Cilenga, wakalenga seelo lya Bulowa a poleni. Humu! Ikuti wakali poelni uzwa kuli Mariya, nkokuti bafu taba buki.

Bulemu! Eco caboola buyo cabupya. Nda cijata buyo eco.

²¹⁴ Mpawo ikuti na waamba kuti kwiina lwaandaano, eco nco tucita, mpawo nkaambonzi Leza nca katwaambila kuli kasya ku zintu zilubide? Nkaambonzi Leza nca kabusya mibili wa Jesu, ikuti na tacili booboo? Aboobo, nywebo mwabona, inga tii kwaba mwanakazi uswaangene muli ncico. Ikuti na kwakaliko, mpawo mibili Wakwe wakali kutandila mbuli banyina Bakwe, Maria, nkaambo waa kaba ankwela kwinda ku kuvunikilwa kwa muuya waka mucitya ku—ku leta nseke, nkabela ta kuluzi. I Muuya Uusalala, ku kumita kulondokede, aleluya, ngooyo Wa kalenga nseke yoonse ya mwaalumi a mwanakazi.

²¹⁵ Sena Jesu waka mwiita kuti “baama”? Amu cijane mu Lugwalo. Wa kamwiita kuti “mwanakazi.” Aleluya! Mwanakazi! (Eco ncipyä. Ako nke kaambo nco cicitila mu nzila mbo cili mukucita.) “Mwanakazi, bona mwana wako.” Mamaile ali milioni munsi lyakwe kwiinda Mbwa kabede.

²¹⁶ Wa kali Leza. Ta kali mu Juda naanka Munamasi. Wa kali Leza, mibili a mibili, Leza kakkala muli Nguwe. Leza kakkala mu nseke ya mwanakazi? Takali kukonzya kucicita. Eyo nseke ya mwanakazi yakacita kuba a cintucimwi cakucita a nyama yesu. Pele bwakali Bulowa kusanganya nseke, cakuti Leza wakavunikila.

²¹⁷ Wa kali kukonzya ku cibikka aa cifumpu ikuti Na kali kuyanda. Iiyi, munene. Wa kali kukonzya ku cibikka awo Mpa kali kuyanda.

²¹⁸ Pele Wa kacileta nkaambo mwanakazi mukuba mu kuwa. Mpaawo kwaka yutuka Mwana wa Leza uulondokede, wakalenga, nakalindu kazyalwa, mibili a buntu.

²¹⁹ Nkaambonzi Davida nca kaamba, “Nse kaboni Uusalala Wangu... lekela Umwi Wangu Uusalala kubona kubola, Umwi Wangu Uusalala kubona kubola. Naanka kuti Nka siye buntu Bwakwe mu gehena”? Davida wakaamba obo. Mwabona? Bantu boonse, mibili, a muuya, zyakalengwa aa Leza, kwiinda kuli Nguwe.

²²⁰ I mwanakazi takali mutumbu. Wa kali mwanakazi. Nda syoma waa kali mwanakazi, uusalala mubotu. Nincobeni. Ta kali cikumbilo. Leza nata kasola kusala cikumbilo catombe.

Mwami nawayanda, Ndi kambauka ali ceeco sunumasiku, pele, "Ino ncinzi cikumbilo catombe cakaindi?" Kuleta Bakwe, kuleta Mwana Wakwe ku nyika mukati, Wa kasala "nakalindu mukutaziba muntu." Walo taka jisi nseke imwi ya kaletwa na cili conse cimbi cindi Muuya Uusalala niwa kamuvunikila. Nkaambo, Leza, mu nzila Yakwe yakusanduka, nzila iilondokede, wakalengwa muli nguwe: buntu, mubili, a muuya, wa Jesu Kristo. Mbo mbubo. Wa kali Mwana wa Leza wakazyalwa kuli nakalindu.

²²¹ Ino eco cakacita nzi? Ca kamwaya mulyango wa sinkondo. Aleluya! Fyuu! Eci cili mukuba kabotu, kuli ndime. Amulange. Nkaambonzi? Wa katyola mulyango wa sinkondo mponya awo, kuti muntu aumwi oyo wakazyalwa mu nyika eyi kwiinda ku kuyanda kwankwela, wataali kukonzya kuya ku Julu nkaambo nkewla nce cinti caka citalisya ku matalikilo, mu muunda wa Edeni, baa bakali vumbilila beni. Cindi Na kacita eco, Wa kamwaya cintu eco mu bubili mponya awo, a kuvuba mulyango wa sinkondo. Kwiinda kunzi? Kubweza Lunyungu lwa Bwami ilwa Abrahamu, ku ciindi citaanzi nciconya, a ku luuma kensi. I Lunyungu Lwabwami ilwa lusyomo a cisyyomezyo, kutali muzeezo wa Maria, pele lwa Leza, lwaka mwaya milyango. Nkokuti, lekela muntunsi kwiinda mu mulyango. Bulemu kuli Leza!

²²² Ino Wa kacita nzi? Mpawo wakabweza milyango yoonse ya sinkondo. Wa kabweza mulyango wa malwazi. Malwazi takali kukonzya kuba mu Busyu Bwakwe. Peepe, munene. Taakwe cintu cimbi cakali kukonzya kuba mu Busyu Bwakwe. Kubambwa kwa dilwe tii kwa kakonzya kwiima mu Busyu Bwakwe. Peepe. Ino Wa kacita nzi?

²²³ Joshua wakafwa. Musa wakafwa. Boonse bamwi babo bakafwa, pele kutali Lunyungu olu Lwabwami. Lufu tii lwaka konzya kwiima awo Buumi mpo bwakabede.

²²⁴ Oyo mwanakazi uzwa ku Naini, kayutuka a mulombe wakwe. Kaima a kuti, "Buka, mulombe."

²²⁵ Oyo musimbi waka fwide, mwana musimbi wa Jairasi, Wa kaamba bbala kaindi eelyo mu inyika iitazizilwe okuya, a kuti, "Mwanamusimbi, kobuka."

²²⁶ Lazaro, kafwide kwa mazuba one a mubili wakwe wabolwa, a buntu bwakwe bwa kazwa kuli nguwo, kwa mazuba one. Wa kati, "Lazaro, ko buka." Bulemu!

²²⁷ Ngooyo Mbwa bede. Ino Wa kacita nzi? Wa kamwaya zinamatizyo zya zintuzyonse. Aleluya!

²²⁸ Cindi Na keelede kufwa mpawo, Ta kakonzya kujata buumi obo. Na takafwa pe, pele Wa kacita kupa buumi obo. Elyo cindi Na kapa buumi obo, Wa kafwa lufu. Elyo buntu Bwakwe buyandisi, mbuli Bbaibbele mbo lyakaamba, kaselukila mu gehena, ku kubweza busena bwangu a busena bwako. I

Lunyungu Lwabwami ilwa Abrahamu! I nzi? Wa kali Lunyungu lwabwami. Oh, bulemu!

²²⁹ Lino tuli Lunyungu lwa Bwami, inzi, olo lukkala a Ijwi, mbubonya buyo mbuli Mbwa kabede. "Nkambo ku matalikilo kwakali Ijwi, alimwi Ijwi lyakali antoomwe a Leza; alimwi Ijwi, lyakaba mu mibili wabuntu, a kukkanla akati kesu." Sena tamu boni awo Lunyungu Lwabwami mpo luleded? I Lunyungu Lwabwami luyo kkala a Ijwi.

²³⁰ Nywebo mula kompama abo bali bambilide kulimvwanya a dyabolosi, a ziyanza zyakwe zya nyika. (Nse kanani kuli ndinywe okuno.) Kumasesa okuya, nywebo nobakambausi nomuzi kuti mula kambauka mazuba aa maleele akainda, ula kambauka kuti kwiina cintu cili boobo mbuli lubapatizyo lwa Muuya Uusalala, mause kuli nduwe, a kuliita lwako kuti Lunyungu lwa Abrahamu.

²³¹ I Lunyungu Lwabwami lukkala a Ijwi. Lunyungu Lwabwami, kutali kuzyalwa aa muntu, kwiina cintu cakucita a mwaalumi na mwanakazi. I mwanakazi ni mbungano; taakwe cakucita a mbungano. Maria taka jisi cakucita a Lunyungu. Ayo mbungano, itegwa nkabunga, tai jisi cakucita ku Lunyungu. Wa kazyalwa kunzi? Kutali kabunga, kutali Methodisti, Baptisti, Presbyteria, Katolika, Lutherani, azimwi zimbi.

²³² Pele, kazyalwa ku Lunyungu Lwabwami ilwa cisymezyo ca Leza, oyo ngo nguwe uubweza mulyango wa sinkondo. Ca kabwezegwa kale kuli nguwe. "Nkambo ikuti na mwakkalilila muli Ndime, a Ijwi Lyangu muli ndinywe, amulombe eco nco muyanda, ciyo citwa kuli ndinywe." Nceeco we. Calo ncisyomezyo. Ca kacitwa kale.

²³³ Buntu Bwakwe buyandisi bwa kaselemukila mu gehena, awo Mpe keelede kuunka. Pele aa buzuba obo bwatatu... Samusoni kabweze mulyango wa dolopo kusule lyakwe, taka jisi cintu cakucita a ncico. Wa kabweza milyango ya gehena, milyango ya cuumbwe, a zintuzyonse zimbi. Ta kaubweza atala lya mulundu, pele Wa kaunyonyoona. Aleluya! Wa kavuba mulyango wa sinkondo.

²³⁴ I milengalenga yaka zulwa nguzu zya dyabulosi, atala, abo Baangelo na taakwe cintu cikonzya kuselemuka. Kwakanyina nkcombeleyzo, nkaambo bulowa bwa mpongo tii bwakakonzya kugusya cibi. Pele Bulowa Bwakwe mwini bwaka gwisyia cibi.

²³⁵ Elyo Wa katanta Kujulu, kasololela baange ku bwaange. Wa kapa zipego ku bantu. Lino, yoonse Lunyungu lwa Abrahamu olo lulibambilide kubbade la muulo, kuboola kuselole a kweempwa zibi zyabo, ku bapatizigwa mu Zina lya Jesu Kristo ku kujatilwa kwa zibi zyako, kuzuzigwa alimwi a Muuya Uusalala, akuzunda kusolekwa.

²³⁶ Elyo cindi bagwisya nyika kuzwa kuli nduwe, zintu ezyo zyakamana, zintuzyonse zilubide, zintuzyonse ziboneka

kulubila, mbuli banakazi amasusu abo, baalumi kaba samide kwabo, a mambungano a tubunga twabo, elyo i—elyo mweembezi uyo inkala ku bamadaikona bakwe, a—a misyobo yoonse ya zintu. Nkamu imwi yanyika ya cintucimwi cimbi kunjila omuya a kucitya mweembeli mucete, ku mutanda kuzwa mu mbungano.

²³⁷ Ko zumanana, mweembeli. Leza aku longezye. Kokkala ncobeni a Ijwi. Uta bwezi cintu.

²³⁸ Wa katanta Kujulu. Ino Wa kacita nzi? Wa kadonkola kapulo, mulyango, kuti, mupailo wa Lunyungu olu lwa Abrahamu. Nkaambonzi? Nkaambonzi? Ikuti na tuli Mubili wa Kristo, ikuti na tuli fwide, tula liyeeya tobeni kafwide a kuzikkwa muli Kristo, a kubuka a Nguwe mu bubuke. Ngo Mutwe wa Mubili. Oko Mutwe nkoubede, Mubili ula a Nguwo. Elyo mpawo, cifumo cino, awo umwi aumwi wa cita ceeco, “nku kkala a Nguwe mu masena aakujulu,” a Lunyungu lwa Bwami. Alumbwe Leza.

²³⁹ Taakwe milyango. To konzyi ku komba kusika *boobu*, a kuti, “Oh, oh, *ndeelyo bbala*.” Huh uh. Bala jala, mpoonya awo.

²⁴⁰ Pele ikuti na moyo wesu tau tupi mulandu; ikuti na tu lizi kuti twe endela mu milao ya Leza; tula bona maumi esu kaasalazigwa; tula cibona; Ijwi lyoonse eelyo Leza ndya kalailila, tula Li bamba; mpawo milyango ya sinkondo aumwi ili njidwe. “Mpawo kolomba eco nco yanda, ciyo citwa kuli nduwe.” “Uyo vuba mulyango wa sinkondo nyina.” Oh, mukwesu, ino ni mbungano iyooba!

²⁴¹ Cindi Nda jokela alubo ku Phoenix, ikuti na Mwami wandi zumizya, Nda langila, cindi Nda enda mu cikombelo, ezyo zyuuno ziyo ndandamikwa, a bunyangu boonse mu nkamu ya Makani mabotu aazwide mu dolopo eli liyo endelana a basalali ba Leza muumi: kuboneka mbuli Munakristo; kwaambaula mbuli Munakristo; kulilemeka mbuli Banakristo; a Muuya wa Leza kaweenda akati kabو, oko, ikuti na umwi wacita cibi, Muuya Uusalala ku ciita mpoonya awo.

²⁴² Ciyo cicita. Mwa kacibona mu mundando wa mipailo, mbuli atala awa aa cipaililo. Oko, kwaamba, “Yebo joka kuya a kubamba eco kululama ku mulumi wako. Koya, kaambile mukaintut wako kuti wakali kubusena, busiku bwainda, a mwanakazi oyo, kakkede aa busena buli *boobu-boobu*.” Ikuti na Uyo cicita awa, kwiinda mu kweenda mu Ijwi, kuswiilila ku Jwi eelyo liniini lya butontozi, Liyo cicita muli nduwe. Muli Lunyungu lwa Abrahamu. Mpawo, taakwe cibi.

²⁴³ Mukambausi, sa inga toyanda kubona eco mu mbungano yako? Kweenda mu mbungano eyi, a kulanga ansi kwiinda *awa*, kubona baalumi a banakazi boonse, cabuleza, kukkala alya kuzuzigwa nguzu zya Leza. Cibi tacikonzyi kuba mukati. Ii muntu weenda mukati a kukkala, Muuya wabuka a kwaamba, “John Jones, uzwa kuli *niini-a-niini*, dolopo, busena buli *boobu*-

boobu. Uli waano kujana kuponesegwa kwa mubili wakwe. Mwabona? Wa kacita cintu *cimwi* kubusena *bumwi*. Wa kacita *ceeci*, elyo wa bweza...wa cita, ku josya *eci*, ku bamba *eci* kabotu, mpawo Leza uyo muponya ku kkulenge eelyo. MBUBOOBU MBWAAMBA I MWAMI.” Ma, ma!

²⁴⁴ Ndipe mbungano, ndipe baalumi bali kkumi, kuzu-..., ngale zini zya Leza, Lunyungu lwa Bwami, kubikka baalumi antoomwe, a kulangilila eco ciyo citika. Amu ndipe ng’anda eyi niini ya bantu mbuli boobu, nkabela Njo mutondezya Mumuni oyo inyika ngo iyo zuzila kuli nguwo. Mbo mbubo. Eco ncencico Leza nca yanda kuti tube. “Muli dolopo likkede aa cilundu.” Muli Lunyungu Lwabwami ilwa Abrahamu. “Lu yoo vuba mulyango wa sinkondo nyina.”

²⁴⁵ Malwazi, kuli kaambo ka malwazi. Nkaako kaambo ka zintu ezi. Elyo Leza, Muuya Uusalala, uli waano kuyubununa cintu eco a ku kwaambila kaambo ncota cimvwisyi. Ino ndi penzi nzi kuli ndiswe? Ta tweedele kulibuzya, “Sa Liyo cicita.” Üli mukucicita kale. Ino ucita nzi?

²⁴⁶ Amulangilile musinsimi oyo. Ta kaswiilila ku guwo lyuungisya, “Bulemu kuli Leza! Aleluya!”

²⁴⁷ Eco ncibotu. Lino, amuyeeye, Nse sampauli ceeco. Nda syoma bantubonse bamvwisyi ceeco. Muntu umwi wakati, “Mukwesu Branham ta syomi mu kwaamba, ‘Bulemu kuli Leza! Aleluya!’” Ee, kolanga aali ndime atala awa eno. Nda syoma mu koongolola, kwaambaula mu myaambo, kuzyana mu Muuya.

²⁴⁸ Pele, mukwesu, cindi wakakacilwa kumvwa Jwi elyo liniini lya butontozi lya Ijwi, eco nce cintu cikutola. Eco nce cintu.

²⁴⁹ Eliya wakalizi zya lubukulusyo lonse lwakali kicitika aanze. Pele wa kali... Tii lwa kamu kwelelezya aanze. Pele cindi na kamvwa Jwi eelyo liniini lya butontozi lya Leza, mpawo waka kwelelezegwa. Elyo wa kavumba busyu bwakwe, wakayutuka. Nkaambonzi? Eliya wakali Lunyungu lwa Abrahamu, katobelaa Ijwi.

²⁵⁰ “Ikuti na mwakkalilila muli Ndime a Majwi Angu muli ndinywe, mpawo amulombe eco nco tuyanda, ciyo citwa kuli ndinywe.”

Atu kotamike mitwe yesu kwakaindi buyo kaniini ku mupailo.

²⁵¹ Oh, mbungano, nzila, cindi Nda kumana kukambauka mbuli boobu, obo Mbwe limvwa! I Muuya ulazwa kuli ndime, nkabela Nda cebuka. Nda bona bantu abo banga baselemukila mu nkomo yabo a kubweza zilyo kuzwa ku bana babo, ku cipa kuli ndime. Nda bona banakazi baniini mukati muno, ndiza a masusu mafwaafwi. Ino inga bacita nzi? Inga bacita kufumbwa cintu mu nyika ca ndime, eco nco bakonzya. Mwaalumi kapona a mukaintu mbuli oyo, elyo mebo kamuzapaula buyo, a Ijwi eelyo,

kumu cisa, manjeceezya akwe kwa kaloka. Elyo nekubaboobo mwaalumi oyo inga waunka awa a muzike, a kundi tuma kwakkumi kwakwe. Yaa. Eco cindibamba kulimvwa, mwabona, Nda kajokela ku nyama mpawo, nywebo mwabona, ncinzi, ncinzi Nce wamba? Nse kanzi kucisa. Tacili ceeco.

²⁵² Pele, oh, mukwesu, a mucizi wangu muniini uuyandwa a mukwesu, ikuti na eelyo ndi Ijwi lya Leza, alimwi oyu Muuya Wakwe kaubamba Ijwi eelyo kuboola ku buumi, kuli ndinywe, ino ciyooba buti ku Buzuba bwa Lubeta? Ndi sola ku mubamba kulibambilila ku buzuba obo. Akaka, akaka amu bweze buyo Ijwi Lyakwe. Ikuti na Nda sola kukambauka kufumbwa cintu citali Ijwi, cisyomezyo ca Leza, nkokuti uli jisi nguzu zya kuboola kuli ndime. Pele eelyo ndi Ijwi. Elyo nkaambo kakuti Nda muyanda.

²⁵³ Takuli kaambo kuti Ta-Ta ndikuyandi kuba mu bwaato. Nkaambo bwaato tabuka kuzubusyi pe. Uya kulicisa, bumwi bwa mazuba aya.

²⁵⁴ We elede kuboola ku Lubeta. “Kuzulwa kuli cimwi nkuzulwa kuli coonse.” Elyo cindi waziba cintu cili coonse kuti cili luleme kucicita, ndi Ijwi lya Leza a cisyomezyo ca kucicita, mpawo to ciciti, mpawo ino kujatikizya ncico? Uyo lombwa kupa kaambo, niinzi mpawo? Cindi Mulumbe oyu cifumo cino wasyuuka kutala ku skriini, ku Buzuba bwa Lubeta, ino kujatikizya nguwo? Amu ciyeeye, beenzuma. Inga mwafwa buzuba kabutana mana. Toonse swebo inga. Elyo cintu comwe masimpe, moyo fwa.

²⁵⁵ Nda kaima buzuba bumwi nke langilila baama bangu, mebo nkemujatilide ku kuboko kwangu. Nda kajata bataata baniini kakutanaba eco, a kumu langilila kaunka.

²⁵⁶ Nda kababona kabaselemukila kumamanino aa lweendo, abo bakali kuyeeya kuti bakali luleme ncobeni. Kwaamba, “Oh, Mukwesu Branham, oh, ikuti Nda konzya buyo kupona kaindi kalamfu aniini!” Ciindi camana kale mpawo. Elyo amuyeeye, lufu talu cinci buntu. Lu cinca biyo busena bwa ndulo bukkala. Elyo ikuti na wabona eco, cintucimwi muli nduwe. Kogambwa lino. Ikuti na wabona eco, cintucimwi muli nduwe cikubamba kulilemeka mu nzila eyo a kulimvwa mu nzila eyo, mbuli kuti to elede kulimvwa, kweempwa cifumo cino, sa ula, mweenzuma? Boola. Koba . . . To elede kuba mbuli boobo. Uli muntu usampukide. Amupone buumi bwa Bwami bwa Bwami bwini. Leza uyanda ndinywe sunu.

²⁵⁷ Sa inga watambika janza lyako, kuciindi mutwe wako kuukoteme, a moyo. Kwaamba, “Mukwesu Branham, Nda tambika janza lyangu kuli Leza. Cakusyomeka, kuzwa ku moyo wangu, obo Mbwe yanda kuba. Eco ncencico ncobeni Nce yanda kuba. Nda ka—Nda kanyongana kuno a zintu zyoonse zimbi, pele ncobeni ta Ndi—Ndi yandi kuba mbuli obo. Ndi yanda kuba eco nco wali kwaambaula cifumo cino. Kondi kombela, Mukwesu Branham. Nda tambika maanza angu kuli Leza,

kutali kuli nduwe, Mukwesu Branham, pele kuli Leza. Elyo mu moyo wangu, Uli zyi moyo wangu. Ndi sukamina kuba musyobo wa Munakristo ngo kanana, Lunyungu lwabwami ilwa Abrahamu, kwiinda muli Jesu Kristo.” Tambika janza lyako eno a kwaamba, “Njo... Kondi kombela, Mukwesu Branham.” Leza aku longezye. Leza aku longezye. Masimpe Uyo cicita kuli nduwe.

²⁵⁸ Taata wesu Wakujulu, mu Mumuni wa Ijwi Lyako, mu nguzu zya bubuke Bwako! Elyo Nda mwvisya, Mwami, bantu abo batakweankobaya ziindi zinji baka nyongana awa, kwinda mu bwandeene... I bantu tabazyi cakucita; umwi kaboola, kaamba cintu comwe; a umwi kaboola, kaamba umbi.

²⁵⁹ Elyo okuno mu Phoenix, eli dolopo pati lya—lya, ee, basikweebela zilengwaleza, oko zintuzyonse kuzwa koonse ku cisi nko zinjila muli ncico, kobile kunyama a kumuuya. Nkeimvwi aa mulundu, buzuba bumwi, a kuyeeya kuvula kwa ziindi Zina lya Leza mbo libelesegwa mu buzuba bwaansi awa, kuvula kwa mamambi manji ayo acitwa, kuvula kwa cibi a tombe mu tugwagwa awa, a mabbiyaholo anzinini zya mu mabba, a zintuzyonse, bunji bwabo bakalibanda kuba basyomi, Munakristo!

²⁶⁰ Banakazi kaba selemuka mu kagwagwa, a musanga wa tombwe mu maanza abo. Keenda kasamide zisani zya bwaamu, cindi Wa kati cila nunka kumbele Lyako, “Calo ncisesemyo,” mbuli cibusu, cakaindi, catombe, cinunka kubusena bumwi. O Leza, mbobuti mwanakazi mbwakonzya kutaminina kuba a Muuya Uusalala kucita cintu cili boobo, a kuziba kuti mu mpemo ya Mufutuli, obo bweema mbuli boobo, kununka? Mbobuti Mbwa konzya kuba a cintu mbuli ceeco mu Bwami Bwakwe? Taata, ikuti nibalizi biyo, alo mamaile ali milioni kuzwa kuli Ndilyo.

²⁶¹ Nda komba, Leza, koba a luse. Taakwe muntu uyanda kwiinka ku zilao ezyo zya basweekede. Taakwe muntu uyanda kuselemukila okuya, Taata. Nkule maningi kuzwa kuli ndiswe toonse kuunka. Nekubaboobo kunsi omuya kuli moyo mubotu mu muntu oyo, ulya mwaalumi, oyo mwanakazi, mwaalumi na mwanakazi kugwasya zyaluzyalo akuba kabotu a sibuuya, awa keenwa buyo kuli dyabulosi. I dyabulosi wacicita eco.

²⁶² Saatani, Nda kulwana, nkaambo uli sinkondo wa Mwami wangu. Nduwe sinkondo wa Ijwi Lyakwe. Elyo Nda kulailila, kwiinda kuli Jesu Kristo, Mwana wa Leza, mbuli muntu uufwika, kuziba kuti Nse jisi nguzu muli lwangu. Nse jisi nguzu zya ku mwiimika. Nse jisi nguzu zya kubamba umwi wa banakazi aba kuti basalazye, umwi wa baalumi aba, abo baswiilila ku teepu eyi, na—na kufumbwa. Nse jisi nzila yaku tubamba kuti balondole. Nse jisi nguzu. Pele Ndi jisi bwami bwa Ijwi lya Leza, mbuli mulanda, ku Li kambauka, a bulizi

ku bwami obo. Taakwe musilikani oyu okuno ujisi nguzu zya kulesya mootokala, pele uli jisi bwami bwa kucicita.

²⁶³ Elyo, Saatani, yebo inga akwalo wainka kuyo jambalila zisolo zyako, nkaambo Nda kulailila, kwiinda kuli Jesu Kristo, kuti mwaangulula bantu aba, moonse mu inyika, kufumbwa oko Mulumbe oyu nkwanga waunka. Amwa angulule. Nda bataminina, kuti bakaulwa. Tabali beni. Ba kaulwa a muulo, Lunyungu lwa Bwami ilwa Abrahamu, Mwami Jesu.

²⁶⁴ Yebo sikuupaupa, uununka, busofwi atombe, sikweena bantu, usolollela boofu mu zilindi zya gehena, ko baangulula. Nda mulailila, kwiinda kuli Leza mumi, kwiinda ku Cituuzyo ca Mwana Wakwe, Jesu, kuti mwaangulula, kuti myuuya yabo iyo yaswa a cilongezyo Cakwe a Busyu Bwakwe, kutegwa bavuba mulyango wa sinkondo oonse. [Kabeela katakwe cintu aa teepu—Mul.] Muli bajisi kulindila *eci*, *eco*, na *cimbi*, na kugumwa kumwi kusalala, na cintucimwi cimbi, pele Nda amba kuti uyo sweekelwa kujata kwako.

²⁶⁵ Mbobuti malwazi mbwa konzya kwiima mu bunanike mbuli boobu? Buyo cindi baakaka kulanga kulaale ku cisyomezyo mbuli taata Abrahamu mbwa kacita, cindi na kakonzya ku Mu bona mu cikozyanyo kwa myaanda ya myaka kuleele, kaboola.

²⁶⁶ Baangulula. Mu Zina ly a Jesu Kristo, bantu aba lekwe baunke.

²⁶⁷ Akube kuti nguzu zya Leza, kumvwisywa kwa Ijwi, mbuli mbo basanzigwa cifumo cino kwiinda kuli Ndilyo, akube kuti kumvwisywa kwa kubamba Ijwi ly a Leza a zisyomezyo Zyakwe zya bwini, jatilila ezyo zitakonzyi kususigwa kwiinda kuli Saatani. Akube kuti umwi aumwi ajate cisyomezyo eco, kaamba, “Eci nee Cico. Ndili jatilide kuli Ncico. Leza wakapanga cisyomezyo. Ndili lunyungu lwa Abrahamu. Mbobuti mbo Ndi konzya kuzumbaunya cisyomezyo Cakwe?” Elyo kuzumanana ncobeni, kwiinda muli Jesu Kristo, Mwami wesu. Ameni.

Nda Mu yanda . . .

²⁶⁸ Wali bambila cifumo cino, beenzuma. Atu kombe lino cababotu.

Nkaambo Wa kasaanguna kundi yanda
A kuula lufutuko lwangu
Aa cisamu ca Kalivari.

²⁶⁹ Sa inga kwakonzeka, kutali kusanka cisetekene, kutali ncobeni . . . Eci—nca bukombi. Atu tambike maanza esu kuli Nguwe tula yanda. Elyo kwaamba:

Nda Mu yanda, Nda Mu yanda
Nkaambo Wa kasaanguna kundi yanda
A kuula lufutuko lwangu
Aa cisamu ca Kalivari.

²⁷⁰ Lino, ku mwanakazi oonse na musimbi omuno, eli ndi janza lyangu. Leza ula muyanda. Ku mwaalumi na mulombe omuno, Leza ula muyanda. Nda muyanda. Lino, Nse konzyi kusika a kubweza maanza anu oonse, pele Leza watondezya kuli ndinywe eco Nce wamba. Kuciindi no twiimba eyo alubo, kunyona buyo a kusukana maanza a muntuumwi. “Eci bantu boonse bayo ziba kuti muli basikwiiya Bangu, cindi mwano jisi luyandisyo, umwi kuli umbi.”

Nda . . .
 . . . kuula lufutuko lwangu
 Aa cisamu ca Kalivari.
 Nda Mu yanda, Nda Mu yanda
 Nkaambo Wa kasaanguna kundi yanda
 A kuula lufutuko lwangu
 Aa cisamu ca Kalivari.

²⁷¹ Sena mula Mu yanda? Oko kulimvwa kubotu kwa Muuya Uusalala! I Ijwi ninzila isalazya, iku cumba, ku kubamba kuba cilenge cipyा, gwisyा zyonse. I Ijwi lila bosya kwiinda cceba lya mabemba obilo, kupalula, kutenda zintu zyoonse zya inyika. Mwabona? Mpawo inga twa limbwa kusalala, kukumbwa kabotu, kuzumina aku Mu syoma. Eyo nje nzila mbo tukonzya kwiimba:

Nda Mu yanda, Nda Mu yanda
 Nkaambo Wa kasaanguna kundi yanda
 A kuula lufutuko lwangu
 Aa Kalivari.

²⁷² Eco ncibotu? Nda ciyanda buyo a moyo wangu oonse. Mwabona? Atu cisole alubo, nyoonse lino, cabwini, kusika atala lya jwi lyako lino.

Nda Mu yanda, Nda Mu yanda
 Nkaambo Wa kasaanguna kundi yanda
 A kuula lufutuko lwangu
 Aa Kalivari ya . . .



ELYO LUNYUNGU LWAKO LUYO VUBA
MILYANGO YA BASINKONDONYINA TNG62-0121M
(And Thy Seed Shall Possess The Gate Of His Enemy)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Munsono kuseeni, Mukazimaziba 21, 1962, ku Faith Tabernacle mu Phoenix, Arizona, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org